

KIMBANGI NA MUBU

 Na ntwala beto kukulumusa bayintu ya beto samu na kusambila, mu zola kutanga fyozi Ndinga ya Nzambi. Mu ke zolaka ntangu nyonso kutanga Ndinga ya Yandi; samu ti bandinga ya munu ke kubwa, ya kele ya muntu, kasi Ndinga ya Yandi lenda ve kubwa ve. Mpe beno bayina ke landaka na buku, mpe nyonso yina, beto tanga na Matthieu kapu 14, na nkokila yayi, na kubandaka na nzila ya 22.

Mpe na mbala mosi Yesu pusaka bilandi ya yandi na kukota na bwatu, samu ti bawu kulutilaka na ntwala na simu yankaka, na yina yandi bikanaka samu na kuvutula bantu.

Mpe ntangu yandi manisaka na kuvutula bantu, yandi mataka na mongo yandi mosi samu na kusambila: mpe ntangu mpimpa kumaka, yandi vwandaka kuna yandi mosi.

Kasi bwatu vwandaka yimeni na kati-kati ya mubu, bimpo vwandaka ningisa yawu: samu ti kitembo vwandaka ngolo.

Mpe nsusu ya ntete Yesu kwendaka sika ya bawu, na kutambilaka na mubu.

Mpe ntangu bilandi kumonaka yandi kutambula na zulu ya masa, bawu kumaka na boma, mpe tubaka, Ya kele dyabulu; mpe bawu bandaka na kuboka na ngolo nyonso samu na boma.

Kasi na mbala mosi Yesu me zonza na bawu, na kutubaka, Beno vwanda na kibakala; ya kele munu; beno vwanda na boma ve.

² Beto kulumusa bayintu ya beto ntangu yayi samu na kusambila. Na yina bayintu mpe bantima ya beto kele ya kukulumusa na ntwala ya Nzambi, ya kele na nsatu na dibuundu, na nkokila yayi, yina beno ke zola kusala Nzambi kuzaba, na kutelemisaka maboko ya beno, mpe ti ba bambuka beno moyo na kisambu? Ti Mfumu kutala beno, kuvwanda na mawa na beto.

³ Tata ya beto ya Mazulu, ntangu yayi beto ke na kukwiza na Ntwala ya Nge, na nzila mpe Nkumbu ya Mfumu Yesu. Na kuzabaka, na kivuvu ya kusakumuka, ti Yandi silaka beto, kana beto ke “lomba kima” na Nkumbu ya Yandi, ti Nge ke pesa yawu na beto. Beto me vutula matondo mingi samu na yayi. Bampova lendaka ve kulakisa mutindu beto ke na kutala na nzutu samu na yawu, na kivuvu yina kele na beto, ti Nge ke na kuwa beto kaka ntangu yayi.

⁴ Nge me mona maboko yayi, Mfumu. Nge zaba yina bawu ke na yawu nsatu. Nge kele yina zaba nyonso, yina ke ya ngolo nyonso, Nzambi yina ke na nsuka ve, mpe beto zaba ti Nge zaba bantima ya bantu. Nge zaba mabanza ya beto. Mpe ntete beto vwanda ya kuvanga, Nge zaba konso dibanza yina beto me kuzwaka, samu ti Nge kele yina ke na nsuka ve.

⁵ Mpe beto ke sambila, Mfumu, na ngunga yayi, na yina bansatu ya beto kele na ntwala ya Nge, tala katuka Mazulu, Mfumu, mpe baka balombili ya beto na ntima ya Nge Mosi, Mfumu, mpe pesa beto mvutu landila bumvwama ya Nkembo ya Nge. Pesa beto nsatu ya ntima ya beto, na kivuvu ti ya kele luzolo ya Kinzambi ya Nge. Mpe beto zaba ti ya kele kyese ya Nge ya mbote samu na kusala luzolo ya Nge.

⁶ Pesa beto kulosama ya nene ya Mvwandulu ya Nge, na nkokila yayi, mbala mosi dyaka Mfumu. Belusa bambevo. Vuukisa bayina kele ya kuzimbana, vumbula bayina kele ya kufwa na disumu mpe bafoti, mpe nata bawu na Luzingu ya malu-malu, na nkokila yayi. Ti beto mona Yesu. Beto me lomba yawu na Nkumbu ya Yandi. Amen.

⁷ Beno lenda vwanda. Beno lemvokila beto na yina beto lenda ve kuzwa samu na bantu, bisika mingi. Kasi, kubanda nkokila ya ntete, bawu tubaka ya lungaka ti bawu kuvutula lutangu mingi ya bantu, na yawu beto me lomba lemvo samu na yina. Mpe Mpangi Grant me tunga kaka kivinga yankaka ve, to, na . . . Mu ke kwikila ti ya ke vwanda na diboko ya kento ti yandi ke nata kukabuka yayi. Ya ntalu, mpangi mosi ya bakala ya ntalu bubu yayi me lomba munu kana mu ke sala yayi kima ya konso mvula, na kuvutuka na Dallas, na dibuundu ya yandi. Kubokila mosi ya nene mutindu yina, na ngunga yayi, na yina bamwelo ke na kugangamaka na nswalu nionso, mpe dyaka muntu yayi kuzola munu kuvutuka mpe kusala kima ya mvula, dyambu. Mu me zola yawu.

⁸ Mu vwanda me kuzwa ntangu ya kubundana na bawu na suka yayi, na Mpangi Gordon Lindsay mpe mingi ya bawu. Mpangi Pearry Green, yina kele yina ke simbisa lukutakanu yina ke na kwiza na Beaumont, yandi kele ya kuvwanda na manima ya munu awa na nkokila yayi. Mpe mingi, ya bankundi ya beto, Mpangi Don na kento ya yandi. Beto kele na kyese mingi na kuzwa bawu awa. Mfumu kusakumuna bawu.

⁹ Ntangu yayi, na nkokila yayi, kaka . . . Mu me meka na kukumisa Bansangu ya munu kaka mpasi ve mutindu ya lendaka vwanda, samu ti ata mwana lendaka bakula yawu.

¹⁰ Mbasi na manima ya midi ke vwanda lukutakanu ya kumwangisa nsangu, mpe mu zola ti beno nyonso lendaka kwiza.

¹¹ Ntangu yayi kana beno kele na balukutakanu na dibuundu ya beno, kuna, beno—beno vwanda kisika beno kele—kisika beno kele na kisalu. Beto zola ve muntu kubika dibuundu ya

bawu, na... Mpe kuna kana beno kele ya kubela mpe zola kukwiza samu ba sambila beno, mpe ti dibuundi ya beno ke na lukutakanu mbasi na manima ya midi, beno zonzila yawu na pasteur ya beno, samu ti yandi kubanza yimbi ve, beno zaba. Ti yandi zaba ti beto kele awa na kusala kintwadi, samu—samu na kusadisa Nzutu nyonso ya Yesu Klisto yina ke vwandaka awa na Dallas mpe na nziunga.

¹² Na yawu, mbasi na manima ya midi, mu banza, na ngunga ya zole na ndambu, mu ke longa Nsangu ya kumwangisa nsangu. Mpe na manima beto ke sambila samu na bantu nyonso ya kubela, kubaka bakalati nyonso ya bisambu mpe bima yina kubikanaka lumingu yayi, mpe kusambilila samu na bawu nyonso mbasi.

¹³ Ntangu yayi dilongi ya munu na nkokila yayi kele mingi mutindu mwa-nsaka, kaka samu na mwa ntangu fyoti. Mpe mu ke meka na kukota na nkokila yayi mutindu mu lenda, na kusambilila samu na bambevo. Yintu ya dilongi ya munu kele, “beno vwanda na boma ve, ya kele Munu,” Yesu ke na kuzonza. Dilongi ya munu kele: *Kimbangi Na Mubu*.

¹⁴ Ya zolaka vwanda na kutala ntangu lutaka mingi na manima ya midi, mwini zolaka kota na yina yayi vwandaka salama, mpe awa ya zolaka vwanda kilumbu mosi ya mwini ya ngolo na kutala mutindu ya kele na kati awa.

¹⁵ Climatiseur ke na kusala ve, mpe bawu ke na kuyidikaka yawu. Ya kele samu na yina mu me soba dilongi ya munu kuna, yina mu zolaka longa, samu mu sala nswalu na yawu, samu beno kuvwanda ve na tiya mutindu yayi.

¹⁶ Kilobi-mbisi ya nene yayi, na manima ya kumona yina yandi kuzwaka na kilumbu yango, vwandaka tala mbote Yesu na kati ya kisalu ya Yandi ya nene.

¹⁷ Mu zolaka kuzola kuzinga na kilumbu yina, samu na kulanda Yandi. Kasi, beno zaba, mu kele na kyesi mu kele dyaka na ntangu ya mbote ya kusala kima mutindu mosi, na kutalaka Yandi kusala bima. Mpe ya kele ya kulutila nene na kutala Yandi mbote bubu yayi kulutila yina ya vwandaka kuna. Mu kele na lukwikilu mingi na Yandi ntangu yayi, mpe lenda kuzwa lukwikilu mingi ntangu yayi kulutila na yina mu zolaka kuzwa kuna, samu ti beto vwandaka me kuzwa bamvula mafunda zole ya kulakisa ti Nsangu ya mbote kele kieleka. Mpe na manima ya bamvula mafunda zole, Yandi kele dyaka moyo, na kusalaka kaka mutindu Yandi salaka kuna, na yawu beto kele na kivuvu ya kulutila nene mpe lulfulu ya nene na lukwikilu ntangu yayi kulutila na yina bawu kuzwaka kuna.

¹⁸ Samu ti, Yandi vwandaka kaka Muntu yina vwandaka kwenda bisika na kutubaka na yinwa ya nene ti—ti Yandi vwandaka ya kufidisa na Nzambi mpe ti vwandaka Mwana ya Nzambi, mpe ti Nzambi vwandaka pesa kimbangi ya Ndinga

ya Yandi ya kusila ya kilumbu yina, na nzila ya Yandi, mpe bawu kuzwaka na kutala kikuma ya kusala ntembe na yawu. Barthéologien, bawu vwandaka! Mpe kana beno tala ya vwandaka kima ya kyadi, ya vwandaka kieleka kyadi, samu ti Barthéologien yango zolaka kwikila Yawu kana Nzambi kufwaka meso ya bawu ve. Biblia ke tuba mutindu yina.

¹⁹ Mpe beno zaba Yandi silaka ti Yandi ke kufwa dyaka bawu meso bubu yayi, samu bawu kumona Yawu ve? Bawu ke vwanda “ke sala mambu ya yimbi, ke vwanda na lunangu, bantu ya kuzola lukemboso kulutila na luzolo ya Nzambi, bantu ya kukondwa kyadi, bantu yina ke zonza yimbi na zulu ya bampangi, ke lenda ve na kukutika banzatu ya bawu, bambeni ya bayina kele mbote; na kulakisaka mutindu ya kinzambi, kasi ke manga Ngolo ya yandi.” Kieleka kaka nsilulu me vutuka dyaka. Mpe beno lenda kaka ve kasi kaka kutala kyadi samu na bantu, mpe meso ya bawu kuvwanda ya kufwa na kilumbu yayi. Na Masonuku yina Nzambi silaka ti zolaka salama kaka na kilumbu yayi, na ngunga yayi, mpe ti beto ke na kutalaka kaka na yawu mpe ke na kutala yawu mbote. Mpe kuna bantu ke tala, mpe ke ningisa yintu ya bawu mpe ke kwenda, na kutubaka, “Mu ke na kumona Yawu ve.” Ya kele kima ya kyadi, kasi dyaka Masonuku fwana kunungisama. Ya fwana kuvwanda mutindu yina.

²⁰ Na yawu bilandi yayi vwandaka ya kusoola na Nzambi. Beno talaka, Yesu tubaka na bawu, “Ntete mbandukulu ya yinza,” Yandi soolaka bawu, mpe bawu vwandaka nkuna ya kutumama ya Nzambi. Ya kele samu ntangu bampasi kukumaka, mpe bantu talaka mutindu kuzwaka Yesu na nsongi, na kyuvu, ya vwandaka ve na kyuvu samu na bawu. Bawu zolaka bakula yawu ve, kasi bawu kubakaka lukanu ya kuzaba kima yankaka ve kasi Yandi. “Nge kaka ke na Ndinga ya Luzingu.” Mpe bawu kubakaka lukanu ya kuvwanda na Yawu, samu ti bawu vwandaka ya kutumama na kisalu yina.

²¹ Mpe mutindu mosi ya kele bubu yayi, babakala mpe bakento yina, bayina kele ya kutumama na Luzingu ya Kukonda nsuka, ke kwiza na Luzingu ya Kukonda nsuka. “Nyonso yina Tata me pesa Munu ke kwiza na Munu.” Yina kele Ndinga ya Yandi, mpe yina lenda ve kukondwa. Ya kele—ya kele Ndinga ya Nzambi.

²² Mpe beto ke mona bilandi yayi ntangu yayi, yina kuzwaka lukutakanu ya nene kilumbu yango, kuna na bilanga ya nene yina vwandaka tandama na lweka ya mongo. Mpe Yesu tubaka na bawu, “Ntangu yayi beno kwenda sabuka mubu, ntete Munu.” Mpe Yandi vwandaka kwenda na mongo, kukondwa muntu yankaka, samu na kusambilila. Mpe bilandi yayi, na manima ya kukutana bankundi, mu lenda banza kaka mutindu bawu vwandaka tala na nzutu.

²³ Samu ti, kukutana bankundi, mpe na manima fwana

kukabuka na bankundi; kaka na ntangu na kutala beno ke banda na kuzabana, kuna beno fwana kutuba beno bikana mbote. Mpe yina ke vwandaka ntangu nyonso mutindu ya mpasi na ntima samu na munu, bisika nyonso na yinsi, bisika nyonso na yinza, mu me kutanaka na bankundi mpe na manima kubika bawu, na kuzabaka ti ya kele na mingi yina beno ke mona dyaka ve tii beno ke kutana bawu na Lufundusu. Ya kele mutindu ya dyambu ya kyadi.

²⁴ Mu lenda banza na bwatu, na yintu ya yawu yina vwandaka pusana na simu. Mpe ya zolaka vwanda Simon Pierre, na maboko mpe mapeka ya kufuluka na misisa, yina vwandaka benda bwatu mpe vwandaka twadisa yawu na kati ya mubu. Mpe bawu nyonso vwandaka sala beno bikana mbote na maboko na bayina vwandaka na simu. Mpe bawu vwandaka boka, “Beno vutuka dyaka mpe beno nata Mulongisi awa samu na kumona beto! Mpe beno kwiza kuzwa lukutakanu yankaka ya reveil; beto me vwanda ya kusakumuna mingi bubu yayi!” Mpe bankundi ya malu-malu vwandaka sala beno bikana mbote na maboko. Mpe yandi me pumbuka na makulu ya bilandi yankaka, mpe me vwanda na yisi na kutala na lweka ya mpangi ya yandi, André, mpe me baka bankayi.

²⁵ Babwatu na ntangu yina vwanda kwendaka na ntwala to na mupepe to na bankayi yina ba vwanda bendaka. Mpe kuna mu banza ti ba zolaka vwanda ya kuvwanda zole na kati ya bwatu, zole na lweka mosi, mpe bawu zolaka...to zole na kiti mosi, mu zolaka tuba, na ba-tolet sambantu to nana mu banza. Ba zolaka benda na kati ya ntangu, mpe mutindu yina ba zolaka kanga bwatu na kutengama ve ntangu bitembo vwandaka sala. Na manima, ntangu mipepe vwandaka fula mbote, bawu zolaka telemisa vwale, mpe kuzyeta na bwatu na vwale.

²⁶ Ya zolaka vwanda manima mosi ya midi ya mwini ya ngolo, kubanda kutala ya Masonuku kaka ntete dyambu yayi, mpe na yawu ya zolaka vwanda manima mosi ya midi kieleka ya swi, ya mwini ya ngolo. Mwini vwandaka kota. Mpe bawu, na yina bawu vwandaka yaba masa, mpe na manima bawu bikaka bankayi mpe vwandaka sala beno bikana mbote na maboko na bantu, “Beto ke na kivuvu ya kumona beno dyaka kilumbu,” na yina bawu vwandaka kwenda na kati ya mubu. Mpe mwini kulalaka, mpe mpimpa vwandaka kuma, mpe kuna na manima ya mwa ntangu mudidi me kubwa.

²⁷ Mpe bawu zolaka baka mbangu ya mbote na—na kuyabamaka, mpe ya kele kisalu ya mpasi ntangu bankayi yango ya nene ya kizitu mingi vwandaka kota na mubu. Mpe mingi ya bawu nyonso vwandaka—vwandaka bilobi-imbisi, mpe bantu ya ngolo ya nene, yina zabaka mubu. Mpe kuna na yina bawu vwandaka vingila Yesu kukota na bwatu mpe kulanda bawu, na ntangu fyoti. Mbote, bawu basikaka kuna, mpe bawu zolaka bika yawu mosi kukwenda na ntwala kaka ntangu

fyoti; mutindu kuzwa bwatu ya beno kubanda, mpe na manima kukwenda.

²⁸ Ya lendaka vwanda ntwenya Jean yina zolaka vwanda muntu ya ntete na kuzonza, samu ti yandi vwandaka ya kulutila buntwenya ya nkonga. Mpe ya zolaka vwanda yandi yina tubaka, “Mu ke na kukumaka kaka ya kulemba mwa fyoti. Beto bika yawu mosi kukwenda na ntwala mwa ntangu fyoti. Beto vingila fyoti, beto fwana sala nswala-nswalu ve. Yandi me kwiza ntete ve, na yawu beto lenda kwandi kuvungila mwa ntangu fyoti mpe mutindu ya kuzwa kupema ya mupepe ya mbote.”

²⁹ Mpe na yina yandi vwandaka kuna na yintu ya yandi ya kulala fyoti, yandi zolaka banda lukutakanu ya kimbangi. Mpe ya kele yina mu zola kuzonzila. Ya zolaka vwanda yandi yina telamaka ntete, mpe tubaka, “Bampangi, ata nyonso yina bantu ke tuba, mpe lutangu ya bantu yina zola kukwikila ve, mu kele kieleka ya kundima ntangu yayi, na manima ya bubu yayi, ti beto ke na kulanda ve muntu ya luvunu. Beto ke na kulanda kima ya mpamba ve kana kaka Nzambi, samu ti muntu ve lenda sala yina Yandi me sala bubu yayi kana ti ya vwandaka Nzambi. Beno zaba, ntangu Yandi bakaka mampa yango mpe me zenga yawu, mpe me kudisa mafunda tanu yango kuna, ya kele kima ya kulutila ngitukulu samu na munu. Ya zolaka vwanda na kyuvu tii bubu yayi,” awa mu ke na kuvutukila kaka kimbangi ya yandi mutindu ya vwandaka, “kasi yina sukisaka dyambu.”

³⁰ Yandi tubaka, “Mu lenda kubambuka moyo na bamvula me luta. Mu vwanda zingaka na yisi pene-pene ya Jourdain. Mpe mu lenda kubambuka moyo, na yina mu vwandaka mwana ya fyoti ya bakala, wapi mutindu mama ya munu, ya kitoko, ya Juif vwanda bakaka munu, na manima ya midi, mpe vwandaka tula munu na zulu ya makulu ya yandi mpe vwandaka bondila munu, kuna na velanda, ntangu ba-coquelicot vwandaka pesa bafololo nzila nyonso ya lweka ya basimu ya Jourdain. Mpe yandi vwanda talaka na lweka ya ntoto ya kuyuma, kisika bantu ya beto kulutilaka na ntoto yayi ya kuyuma. Yandi vwandaka tuba na munu masolo ya Biblia. Mosi ya masolo ya kulutila yina mu ke bambuka moyo, vwandaka ya kento ya Sunamite mpe ntangu mwa mwana ya yandi ya bakala kufwaka, mpe—mpe profete vumbulaka na lufwa mwa mwana yayi ya bakala dyaka na lufwa. Ya vwanda vwandaka disolo ya zola mingi na ntima.

³¹ “Kasi mosi ya masolo ya kulutila zola mingi na ntima, mpe mama vwanda tubaka na munu, yandi ke tuba, ‘Ntangu yayi, Jean, nge kele kaka mwa mwana ya bakala; kasi mu zola nge kubambuka moyo, na yina nge ke na kukulaka, ti, Yehovah ya nene basisaka bantu ya beto na Égypte, mpe beto kulutilaka na ntoto ya kuyuma yina na kusabukaka nzadi kuna. Mpe nyonso samu na bamvula makumi yiya, bawu kuzyetaka na ntoto ya kuyuma yina, ata bisika ya kuzwa bilele, mpe ata kisika ya kudya. Mpe Nzambi vwandaka nokisa mampa na yisi na

kukatukaka mazulu, konso nkokila, mpe dikisaka bantu ya beto na ntoto ya kuyuma yina, samu ti bawu vwandaka na nzila ya kisalu, na kulantaka Yehovah ya nene. Mpe ntangu yayi, kilumbu mosi, Yehovah ke kuma nsuni awa na zulu ya ntoto, na kati ya nzutu ya Muntu, Yandi ke bokilama Muntu ya kukusa, Mesiya.'

³² "Mpe mu ke bambuka moyo," yandi vwandaka tuba, "na kuvwandaka mwa mwana ya bakala, mutindu ti yintu ya munu ya mwa mwana ya bakala zolaka bakula, vwanda meka na kubakula, 'Mutindu Nzambi kudikisaka bawu nyonso yina, mafuku zole na ndambu ya bantu, na ntoto ya kuyuma yina? Wapi mutindu Yandi kuzwaka mampa nyonso?' Mpe mu vwanda yufulaka mama, 'Mama, Yandi kele, Yehovah ke—ke na binkunku ya nene ya bafour kuna na zulu, mpe Yandi zolaka sala mampa nyonso, mpe vwandaka kulumuka na nswalu nyonso na nkokila na kutula yawu na zulu ya ntoto, samu na bantu, mpe mazulu ya nene ya Yehovah kele ya kufuluka na bafour?' Yandi vwandaka tuba, 'Ve, mwana, nge kele mingi fytot na kubakula. Beno me mona, Yehowa kele Kiyidiki. Yandi ke na nsatu ya bafour ve. Yandi ke zonza kaka, mpe Ndinga ya Yandi ke talisa ntangu Yandi ke zonza. Yandi kele Yehovah ya nene, mpe Yandi ke zonza kaka yawu. Mpe Bawanzio ke kabula yawu na zulu ya ntoto, samu na bantu.'

³³ "Mpe bubu yayi, ntangu mu me mona Yandi kutelama kuna, beno talaka kutala yina na kizizi ya Yandi? Ya vwandaka ve na ntembe na dibanza ya Yandi. Mu me mata na manima ya ditadi, mpe me tala Yandi mbote mutindu Yandi bakaka dimpa yina mpe zengaka yawu, mpe pesaka yawu na... Bisyelo ya Yandi, beto, samu na kukabula yawu na bantu. Mpe na manima ntangu Yandi vutukaka na kukabula dyaka, dimpa yango kumaka dyaka ya muvimba. Mpe Yandi kusalaka yawu bankama ya bambala, tii muntu nyonso kufulukaka, mpe ya vwandaka na bitunga, ya kufuluka, yina ba lokotaka. Mu zaba ti yina zolaka vwanda kana kaka Yehowa, samu ti Yandi kusalaka mutindu Yehowa kusalaka. Kaka Yehovah lenda kuvanga. Mpe mu zaba ti Muntu yina kele muntu ya luvunu ve. Ya kele kaka na Kiyidiki mosi, mpe ya kele Yehovah. Mpe ntangu yayi, na nyonso ya bima yina mu me mona, yina me sepelisa munu.

³⁴ "Mu zola beno kuzaba ntangu yayi ti ntima ya munu kele ya muvimba ya kubika, mpe mu ke kwikila ya muvimba ti Yandi kele ve kaka profete. Yandi kele profete, kasi Yandi kele ya kuluta profete. Yandi kele kana kaka Yehowa Nzambi yina ke na kuzinga na kati-kati ya beto, samu ti Yandi me vanga dimpa, mpe Yandi vwandaka na bifu ya Yehovah. Ya kele ya ngitukulu ve ti Yandi kutubaka, 'Kana Mu ke sala ve bisalu ya Tata ya Munu, kuna beno kwikila na Munu ve; kasi kana Mu ke sala bisalu ya Tata ya Munu, mpe beno lenda ve kukwikila Munu, beno kwikila bisalu, samu ti yawu ke pesa kimbangi ya Munu mpe ke tuba

Nani Mu kele.' Ya ke talana mutindu bantu zolaka mona yawu, mpasi ve."

³⁵ Mpe Jean kundimaka ti Yandi vwandaka Mesiya, Muntu yina Ésaïe tubilaka, "Mwana mosi me butama na beto, mpe Nkumbu ya Yandi ke vwanda Konseye, Ntinu ya Ngemba, Nzambi ya Ngolo nyonso, Tata ya Kukonda nsuka." Mpe Jean kundimaka samu na yina yandi kumonaka. Ntwenya ya bakala yayi vwandaka pesa kimbangi ya yandi.

³⁶ Na kutala na ntangu yina, Simon Pierre me tuba, "Mbote, ntangu yayi, mwa minuti kaka. Kana beto ke kuzwa lukutakanu ya bimbangi, mu ke zola kuzwa kima ya kutuba. Beno zaba, mu vwandaka na maketi-keti na kima ya muvimbba, ntangu mpangi ya munu ya bakala André, yina vwandaka na lukutakanu ya reveil ya Jean profete, yina pesaka kimbangi ti Mesiya vwandaka kwiza mpe yandi zolaka kotisa Yandi. Mpe mu vwandaka na mwa maketi-keti na yina André tubaka na munu, samu ti mu kuwaka mitindu nyonso ya masolo ya Mesiya mpe nyonso yankaka.

³⁷ "Kasi beno nyonso bampangi beno ke bambuka moyo na tata ya munu ya kiboba. Nkumbu ya yandi vwandaka Jonas. Mpe beno ke bambuka moyo na yandi, na mutindu ti yandi vwandaka mukwikidi ya kieleka ya kukwikama. Mutindu ti mu lenda bambuka moyo na mama mpe papa, mpe beto nyonso, mutindu beto vwandaka loba samu na kuzinga, mpe beto vwandaka kuzwa ata mbisi ve; beto vwandaka na nsatu ya dimpa, mpe mutindu ti beto vwandaka fukama na ntoto mpe vwandaka sambila na Nzambi, 'Sala beto kuzwa bubu yayi, Nzambi, ti beto lendaka tekisa mbisi ya beto, mpe kufuta bamfuka ya beto, kuzwa madya ya kudya.' Mpe mutindu beto vwandaka kwenda na mubu, na kitembo, mpe beto vwandaka sala ngolo na—na kukutanaka bitembo yango.

³⁸ "Mpe papa, mu lenda mona nsuki ya yandi ya mpembe kubwa na manima ya yandi, kilumbu mosi na yina yandi vwandaka ya kuvwanda na zulu ya ndilu ya bwatu mpe zonzaka na munu, na kutubaka, 'Simon, nge kele mwana ya munu ya bakala ya kuluntu. Beno zaba, mu ke kwikilaka ntangu nyonso, Simon, ti mu ke mona Mesiya. Bantu ya beto ke na kuvungila Yandi kubanda Éden. Mpe beto kele ya kundima ti Yandi ke na kwiza, ata lutangu ya ntangu. Ya vwandaka bamvula mafunda yiya me luta, nge ke tuba. Kasi mu ke kwikila ti Mesiya ke kwiza. Mpe konso Juif me kwikila ti yandi ke mona Mesiya na nsungi ya yandi. Mu ke na kivuvu na kumona Yandi na nsungi ya munu. Kasi ya ke talana mutindu, mu ke na kukumaka kiboba ntangu yayi, mu fwana kubika mubu, mpe mu me banda na kutala mpasi na bisika nyonso, Ya lenda vwanda ti mu ke mona Yandi ve na ntangu ya munu. Kasi mu banza nge lenda, mwana ya munu.

³⁹ "Mpe mu zola kulonga nge na kati ya Masonuku. Mwana,

ntete Mesiya kubasika na kumonika na nzutu, ya ke vwanda na mitindu nyonso ya bima ke salama, mitindu nyonso ya bima ya luvunu, samu ti Satana ke sala yawu, samu na kubebisa lutumu ya Mesiya ya kieleka ntangu Yandi ke kwiza.” Ya ke vwandaka konso ntangu mutindu yina; dyaka mutindu yina.

⁴⁰ Mpe na manima beto me tala, yandi tubaka, “Mu ke bambuka moyo yandi tulaka diboko ya yandi na nziunga ya munu, yandi tubaka, ‘Mwana, ya kele kaka na mutindu mosi yina nge ke vwanda na kiyeka ya kuzaba Mesiya yango. Awa beto me vwanda bankama ya bamvula kukondwa profete mosi. Malachie vwandaka profete ya beto ya nsuka. Yina me vwanda bankama yiya ya bamvula me luta, beto vwandaka ve na profete. Kasi bambuka moyo, Moïse tubaka na beto, na Masonuku, ti, ntangu Mesiya ke kwiza, Yandi ke vwanda profete, ntangu Yandi ke basika na kumonika na nzutu. Beto ba-Juif ba me longaka beto na kukwikila profete. Mpe nzyetolo ya Mesiya na zulu ya ntoto kele Ndinga ya kuzonza ya Nzambi, yina Yandi silaka beto. Mpe Ndinga konso ntangu ke kwizaka na profete, mpe profete ke siamisaka Ndinga yango. Kuzimbana yawu ata fyoti ve, mwana! Ya lendaka vwanda na bima ya nene yina ke telama, ya lendaka vwanda na bakyese ya yinza ya nene mpe—mpe bima ya nene. Kasi bambuka moyo, Mesiya ke vwanda profete, samu ti beto zaba ti Nzambi ke sobaka ata mbala mosi ve mutindu ya Yandi, mpe Yandi tubaka Mesiya ke vwanda profete. Na yawu bambuka moyo, mwana, baprofete kele bayina kele na Ndinga ya Mfumu. Mpe ntangu Mesiya ke kwiza, Yandi ke vwanda profete.’

⁴¹ “Mu lenda dyaka kaka kuwa na nzutu diboko ya yandi,” tubaka Simon, “na yina yandi tulaka yawu na nziunga ya munu. Mpe André vwandaka ya kutelama kuna vwandaka sukula lukosi, na ntangu yango. Nge me bambuka moyo na yawu, André?”

“Yinga, Simon, mu—mu me bambuka yawu.”

⁴² “Mpe André vwanda meka na kutuba na munu ti Jean yayi vwandaka profete. Mu vwandaka na bima yankaka ya kusala, zolaka tekisa bambisi mpe bima. Na yawu tata kufwaka bamvula me luta, kasi mu ntangu nyonso ke bumbaka yawu na dibanza. papa tubaka, ‘Mesiya yayi ke vwanda profete yina ke zabana na Masonuku, mpe kuzimbana yawu ve, samu ti ya kele Ndinga ya kuzonza ya Nzambi. Mpe Ndinga yango ntangu nyonso na konso ntangu me kwizaka na baprofete; yina monikisaka yawu, to lakisa yina vwandaka nsilulu ya nsungi.’”

⁴³ Mpe ntangu yayi Simon, “Kilumbu mosi,” yandi tubaka, yandi tubaka, “nge zaba, André me lomba na munu na kukwenda na lukutakanu mosi. Mpe mu kwendaka kuna na lukutakanu kisika Muntu yayi, Yesu, vwandaka. Mpe mu vwanda kuwa mitindu nyonso ya bansangu. Kuna vwandaka na Yesu yina kutelamaka, ntete Yandi, yina silaka kuvwanda

kima mosi ya nene, yandi twadisaka bankama yiya na ngaanda mpe bawu nyonso kufwaka, mpe nyonso yina. Mu banzaka ti ya vwandaka mosi dyaka yankaka ya mutindu bawu, na mutindu mosi ya kyeše ya nene ya reveal mosi, to dénomination mosi ya nene bawu zolaka sala. Kasi kilumbu mosi mu banzaka mu ke kwenda na André awa, mpangi ya munu ya bakala.”

⁴⁴ Mpe mu lenda banza, na kutala na ntangu yina, bwatu me banda na kuningana. Muntu mosi me banda na kuboka, mpe yandi tubaka, “Vwanda! Kuningisa ve bwatu. Vingila fyoti. Vwanda swi.”

⁴⁵ Mpe yandi tubaka, “Beno zaba, ntangu mu kulumukaka kuna mpe kwendaka na ntwala ya Yandi, mbala ya ntete, Yandi talaka munu mbala mosi kaka na meso mpe tubaka na munu yinki vwandaka nkumbu ya munu. Yandi kumonaka munu ata mbala mosi ve ntete. Ve kaka ti Yandi zabaka munu, kasi Yandi zabaka tata ya munu ya kiboba ya santu yina, yina longaka munu na Masonuku. Mpe mu zabaka ti Yina vwandaka Mesiya. Yina sukisaka dyambu samu na munu, kaka kuna. Ya vwandaka. Yina sungikaka yawu, samu na munu.”

⁴⁶ Ya fwana vwanda Philippe yina tubaka, “Mu lenda tuba dyambu awa?” Ntangu yayi yandi tubaka, “Mpangi Nathanaël, ti yayi kusala nge mpasi ve; samu ti, nge zaba beto longokaka mikanda bamvula mpe bamvula, na yina Mesiya ke vwanda. Kasi ntangu mu monaka Yandi kusala yawu, mu me sala nswalu mpe me kuzwa nkundi ya munu awa, Nathanaël. Mpe ntangu yandi me kwiza kuna . . .”

Nathanaël me tuba, “Bika mu tuba yawu. Bika mu tuba yawu.”

⁴⁷ Oh, beno zaba, ya kele na kima na kutala ntangu Yesu me sala kima samu na beno, beno—beno lenda kaka ve kutelama swi, beno fwana kutuba yawu, beno mosi. Ya kele kieleka ve? Kana ya kele kima ya kieleka, beno fwana kaka kutuba yawu. Ntangu Yandi me fulusa munu na Mpeve-Santu, mu zola kuzonzila na yawu. Mu zola muntu kuzaba yawu. Muntu yankaka ve kutuba yawu; mu zola kutuba yawu, munu mosi.

⁴⁸ Mpe mu ke banza kaka, Nathanaël kuzwaka kyeše mpe tubaka, “Beno zaba, mu zola kutuba yayi. Mu vwandaka na mwa maketi-keti na nge, Philippe, ntangu nge tubilaka munu. Mu yufulaka nge, ‘Ya lenda basika na Nazareth kima ya mbote?’ Mpe nge pesaka munu mvutu ya kulutila mbote yina ba me pesaka ntete ve na muntu, ‘Kwiza mpe mona.’” Yina ke sala mbote bubu yayi. Ya kele kieleka. Beno vwanda ve na yinzo mpe kuzonzila yimbi. Beno kwiza, tala beno mosi, beno me mona. “Yandi tubaka, ‘Ya lenda basika na Nazareth kima ya mbote?’ Yandi tubaka, ‘Kwiza mpe mona nge mosi.’ Mpe nge zaba yina nge tubaka na munu.

⁴⁹ “Mpe ntangu mu belamaka na Ntwala ya Yandi, mpe Yandi tubaka na munu ti mu vwandaka ‘Hébreux, muntu ya Israël, mpe ti mu vwandaka muntu ya kusungama,’ mu zabaka yawu.

⁵⁰ “Kasi mu ke na kumiyufula, ‘Wapi mutindu ya lendaka vwanda?’ Yandi vwandaka talana mutindu muntu nyonso. Mu vwandaka vingila Mesiya kukulumuka na bavelanda ya wolo ya Mazulu, mbala mosi na mfumu ya dénomination awa, na Jérusalem, kubelama mpe kutuba, ‘Caiphe, mu me kuma.’ Kasi ba talaka, Yandi kubasika na Nazareth, na dibuta mosi ya mputu; mpe na kutala mutindu ya nkumbu ya ndombi na manima ya Yandi, mutindu ‘mwana ya makangu.’ Awa Yandi kutelamaka, ya kulgata bilele ya ntangu nyonso, ve mutindu ya nganga-Nzambi to muntu mosi; kaka mutindu muntu nyonso. Mpe mu banzaka, ntangu mu belamaka kuna, ‘Wapi mutindu yina lenda vwanda Mesiya? Kilele mosi ya ntama, Yandi lwataka kubanda ntangu Yandi vwandaka ntwenya ya bakala, mpe awa ya kulgata kinkuti mosi yango; mpe nsuki ya Yandi ya kubwa na manima ya Yandi. Mpe mutindu muntu nyonso ya bala-bala.’

⁵¹ “Mpe Yandi me tala munu na kizizi, mpe me tuba, ‘Ntete Philippe kubokila nge, ntangu nge vwandaka na yisi ya yinti, mu monaka nge.’ Yina sujisaka dyambu samu na munu. Mu zabaka, na nzila ya Ndinga, ti ya vwandaka Mesiya. Yina vwandaka Yandi.”

⁵² Mpe bwatu zolaka ningana, mpe lukutakanu ya bimbangi vwandaka landila. Oh, wapi mutindu ya ntangu ya mbote mingi bawu vwanda kuzwa, kuna na mubu, bawu vwanda kuzwa kaka ntangu mosi ya nene.

⁵³ André tubaka, “Mu ke zola kutuba kima yina na kutala salaka munu kuyindula mwa ntangu fyoti. Beno ke bambuka moyo ntangu beto—beto vwandaka kulumuka na Jéricho? Yandi tubaka, ‘Beto fwana mata; Mu ke na nsatu ya kuluta na Samarie.’ Na yawu, Yandi mataka na Samarie mpe kuna na mbanza ya Sychar, ntangu Yandi fidisaka beto nyonso na kukwenda sumba bima ya kudya na mbanza.”

⁵⁴ “Oh, yinga, mu ke bambuka moyo na yawu, mbote!” Bawu nyonso, “Yinga, yinga!” Bwatu vwanda ningana kaka, muntu nyonso vwanda kuzwa kimbangi ya mbote na manima lukutakanu ya reveal kumanisaka. Na yawu ba vwanda kuzwa lukutakanu yayi ya bimbangi.

⁵⁵ Mpe yandi tubaka, “Yinga, mpe beno ke bambuka moyo beto vutukaka na malembe, mpe, na mpamukunu, beto monaka Mulongisi ya beto kusolula na kento ya kindumba ya kuzabana. ‘Uh-huh,’ beto banzaka, ‘ya kele yimbi. Beno tala Yandi kuna kusolula na ntwenya ya kento yayi. Mpe me fidisa beto, mpe awa Yandi kele awa ya kuvwanda na kento yayi ya luzingu ya yimbi.’ Beno bambuka moyo, beto vwandaka kaka na manima ya mavunda, mpe beto kuwaka disolo ya bawu.

⁵⁶ “Mpe beto kuwaka Yandi kutuba na yandi, ‘Kento, kwenda baka bakala ya nge mpe beno kwiza.’

⁵⁷ “Mpe beto tubaka, ‘Oh, beto lendaka zimbana, ya lendaka vwanda ti kento vwandaka kaka ya kuzabana ya kukwela na luyalu.’

⁵⁸ “Mpe kento talaka Yandi na kizizi, mpe tubaka, ‘Tata, mu kele na bakala ve.’

⁵⁹ “Beno me bambuka moyo mutindu bantima ya beto kukondwaka? ‘Mesiya ya beto ya nene yina beto tulaka kivuvu, awa vwandaka me simbama na katì ya luvunu, na disolo ya tiya, samu ti Yandi me tuba, “kwenda baka bakala ya nge,” mpe yandi vutulaka kimbangi ti yandi vwandaka na bakala ve. Ntangu yayi ya me vutukila Yandi.’ Beno bambuka moyo mutindu beto nyonso kuyitukaka, mpe mupepe ya yinwa kukatukilaka beto?”

“Yinga, mu ke bambukila yawu moyo.”

⁶⁰ “Mpe kuna beno ke bambuka moyo na bandinga ke landa? Yandi tubaka, ‘Nge me tuba kieleka, samu ti nge me kuzwa tanu, mpe yandi yina ke na kuzingaka na nge ntangu yayi kele ya nge ve.’ Oh, beno ke bambuka moyo na kimbangi na manima ya divunda? Oh!” Beno me mona, beno lenda ve kukanga Yandi. Yandi kele Nzambi. “Oh,” Simon tubaka, “kaka yina . . .” André tubaka, “Yina sukisaka dyambu samu na munu.”

⁶¹ Barthélémy tubaka, “Beno vingila, mu zola kubwela kimbangi. Mu lenda sala yawu, bampangi?”

⁶² “Oh, mbote, mu banza ti nge lenda, beto kele na ntangu mingi. Yandi me kwiza ntete ve, na yawu beto ke bula kaka bankayi fyoti. Landila, Barthélémy, pesa kimbangi.”

⁶³ “Mbote, mosi ya bima ya nene samu na munu. Beno ke bambuka moyo na mpangi ya beto ya kento kuna na Jéricho, ya nkumbu ya Rébecca?”

“Yinga.”

“Mpe bakala ya yandi vwandaka na restaurant kuna.”

“Uh-huh.”

⁶⁴ “Mpe—mpe yandi vwandaka muntu ya mumbungu, mpe nkumbu ya yandi vwandaka Zachée.”

“Yinga, yinga, mu ke na kubambuka mbote na yandi.”

⁶⁵ “Beno me bambuka moyo, yandi vwandaka—yandi vwandaka mosi ya bampangi ya beto ya kento. Yandi kukwikilaka na Mfumu, mpe yandi vwandaka na boma mingi ti Zachée zolaka lutisa nyonso yayi kukondwa kundima Yesu. Mpe, oh, Zachée vwandaka nkundi mosi ya mbote mingi ya nganga-Nzambi kuna. Mpe na yawu yandi vwandaka sambilà ti kima kusalama samu ti meso ya yandi kufunguka, mpe bakala zolaka bakula ti yayi vwandaka Mulongisi, ti yayi vwandaka Ndinga ya Nzambi ya kusiamisa, yina me kuma nsuni na katì-

kati ya beto. Mpe beto mekaka na kutuba na yandi...tuba na yandi na mutindu ti Yesu ya Nazareth kuzabaka mansweki ya ntima, na kulakisaka ti Yandi vwandaka Ndinga, samu ti Ndinga ke monaka mabanza na ntima.

⁶⁶ “‘Buzoba,’ yandi tubaka, ‘Mu ke kwikila na nganga-Nzambi. Yina nganga-Nzambi ke tuba kele ya kulunga mingi samu na munu.’ Samu ti yandi vwandaka na bimvuka nyonso ya mbanza, Kiwanis mpe nyonso yankaka yina, beno zaba, na yawu yandi...mutindu mpasi samu na yandi na kubika yawu. Na yawu Rébecca lombaka na beto nyonso na kusambila, na kusambila. Mpe konso ntangu beto ke kuma na dyambu Yandi vwandaka profete, yandi ke tuba, ‘Buzoba! Nganga-Nzambi ke tuba, “Yandi kele Béelzébul. Yandi kele dyabulu. Yandi ke salaka yawu na ngolo ya dyabulu. Mpe Yandi ke salaka kaka mabanza ya muntu. Kaka yina ya kele na yawu. Ya kele na kima ve na yawu.” Na yawu ya kele ve na kima mutindu yina na kilumbu yayi; beto me kuzwa baprofete ve bankama ya bamvula. Mpe wapi mutindu Muntu yina, kukondwa kalati ya kubundana, wapi mutindu Yandi lenda vwanda kwandi profete? Oh, ve Yandi lenda vwanda ve kima mutindu yina!’

⁶⁷ “Kasi, beno zaba, Rébecca landilaka na kukangama, kento ya yandi, na kusambilaka. Mpe suka mosi ntangu Yesu vwandaka kota na mbanza, mbote, kuna beto talaka ti, Rébecca tubaka na beto ti Zachée kwendaka na bala-bala, samu na kumona Yandi. Na yawu yandi vwanda kwikila ve ti Yandi vwandaka profete, na yawu yandi tubaka, ‘Mu ke tala kaka Yandi,’ mutindu bakala pesaka beto kimbangi na restaurant kilumbu yankaka yina ntangu beto vwandaka kudya. Na yawu yandi mataka na yinti ya sycomore, mpe yandi tubaka, ‘Nge zaba yinki, mu ke bumbama kaka munu mosi awa samu Yandi kulenda ve na kumona munu. Mu kele muntu ya fytot, na mutindu nyonso, ya nkufi mingi. Mpe mu lenda ve kumona Yandi na yisi kuna, na kati ya nkonga ya bantu, na yawu mu ke mata kaka awa na yinti.’ Mpe yandi kumaka kisika bintala zole—zole kukutanaka, mpe kuna yandi vwandaka, na bintala yayi.”

⁶⁸ Ya kele kaka kisika ya mbote ya kuvwanda mpe kulonguka yawu nyonso. Ya kele kisika banzila zole ke kutana, ya beno mpe ya Nzambi; mabanza ya beno. Ya kele kima ya mbote, samu na kubanza na yawu nyonso.

⁶⁹ “Na yawu yandi tubaka, ‘Nge zaba yinki, Yandi zolaka vwanda profete. Yandi zolaka vwanda. Ya lendaka vwanda ti mu lenda vwanda na foti. Na yawu mu ke tuba na beno yina, mu ke tala Yandi mbote; mpe Yandi ke zaba munu ve. Na yawu mu ke baka kaka makassa mpe kubenda yawu mutindu yayi, na nziunga ya munu, mpe mu ke bumbama munu mosi samu Yandi kumona munu ata kwandi ve. Mpe mu ke tala Yandi mbote ntangu Yandi ke luta. Mpe kana Yandi kutilana ve mutindu muntu ya mbote, mu ke zabisa Yandi dibanza ya munu, ya kuvwanda awa na

yinti yayi.' Na yawu yandi vwandaka tala mbote, mpe yandi vwandaka na dikasa yina yandi zolaka telemisa samu na kumona Yandi ntangu Yandi ke kwiza baluka na nsongi.

⁷⁰ "Mpe ntangu Yandi kubalukaka na nsongi, kulumukaka bala-bala, beno zaba, na kutalaka lweka mosi na yankaka, mpe bilandi na kutubaka, 'Beno telama na lweka. Beno lemvakila munu.' Mpe bantu na bana ya kubela mpe bima. 'Lemvo, Mulongisi me lemba mingi; lukutakanu yina ya nene ya mazono na nkokila. Mpe, na mutindu ya mbote, na lemvo beno lenda telama na lweka mpe kubika Yandi kuluta. Mbote, Yandi ke na bakaka nzila ya Yandi na mbanza, mpe na lemvo beno lenda kaka kutelama na lweka?' Mpe Zachée ya kuvwanda na zulu awa na yinti, kutalaka na yisi na Yandi.

⁷¹ "Mpe Yesu me kwiza mbala mosi kaka na yisi ya yinti, me telama, me tala na zulu mpe me tuba, 'Zachée, kulumuka kuna. Mu ke kwenda na nge na yinzo bubu yayi, samu na kudya ya nkokila.' Yina sukisaka dyambu samu na munu. Yandi zabaka ti yandi vwandaka na zulu kuna, mpe zabaka nkumbu ya yandi, nani yandi vwandaka. Yina sukisaka dyambu. Yina kele Mesiya, samu na munu. Yinga, tata. Samu ti, beto zaba Mesiya zolaka sala yawu. Kieleka. Na yawu Yandi zolaka kwenda na yinzo na yandi, kilumbu yango samu na kudya ya nkokila. Wapi ntangu ya nene ya vwandaka! Beto ke bambukila yawu moyo."

⁷² Beno zaba, ya fwana vwanda na kutala na ntangu yina, lukutakanu ya bimbangi vwandaka landila. Beno zaba, bilandi yayi na ngaanda kuna na mubu, ke na kupesa bimbangi, ya fwana vwanda na kitombe ya mpimpa kisika mosi, na zulu kuna na bantoto ya node, ti Satana kwendaka na zulu ya mongo mpe talaka na yisi. Yandi kutalaka na lukutakanu yango ya bimbangi, mpe yandi monaka ti bawu kukwendaka kukondwa Yandi. Kuna vwandaka siansi ya yandi.

⁷³ Beno me mona, mu banza ti nsaka yango na kutala ke na kuvutukila kaka, ke na kuvutukaka yawu mosi. Bawu, na kyese ya lukutakanu ya reveal, bawu kukwendaka kukondwa Yandi. Mpe mu banza ti ya kele mingi yina ke na kusalamaka na beto bubu yayi, ti, na ngunga yayi ya muvusu, mpe na manima ya reveal ya nene yayi yina beto kele bambangi. Yawu me luta bisika nyonso na yinza. Konso yinsi me kuzwa batiya ya reveal kutungama, mpe kupela; balukutakanu ya nene ya kubelukaya nzutu; bantu kuzwa Mpeve-Santu, na bantenta ya mafunda na mafunda. Mpe na kyese ya yawu, mutindu bilandi yango vwandaka pesa bimbangi na yina Yandi kusalaka, "mpe, oh, beto me mona Yandi kusala *yayi*, mpe beto me mona Yandi kusala *yina*," mu banza ti beto me kwenda mutindu bawu, kukondwa Yandi.

⁷⁴ Beto me kwenda landila bantangu ya mbote ya nene mingi *yina*—*yina* reveal me pesa. Beto me kwenda na kulandilaka

bantangu ya mbote ya kusala mbongo mingi, mabuundu, kutunga bayinzo ya kulutila nene, bisika ya nene mingi ya mafuku ya ba-dollar, balukolo ya nene, mitindu ya kulongoka, mpe kusala dénomination ya beto kukula. Mpe kuna kuzwa manaka ya beto ya communisme, anticomunisme, ya kele kaka yina beto lenda zonzila bubu yayi. Mpe kima ya ntete beno zaba, Satana me mona beto na manaka ya anticomunisme, na manaka ya beto ya nene ya dénomination, mpe na ya beto “mafuku mingi,” mpe nyonso yina, mutindu bawu me kuzwa.

⁷⁵ Mpe beto me kwenda na kubikaka balukutakanu ya bisambu ya ntangu yina ya ntama mpe mvutukulu ya mbotika ya Mpeve-Santu, tii tiya ke na kufwaka malembe- malembe. Beno lenda bokila, mpe samu na kumeka na kuzwa bantu na kwiza na chaire, mpe bawu ke tambula kaka mutindu bawu kele na kutala ya kufwa, ya kele ya kulutila samu na bawu na kkwiza. Mpe kuna kana ba lomba balongi na kwiza sambila na bawu, “Oh, samu na yinki yandi me lomba yawu samu na munu?” Mpe bawu ke kulumuka kuna, mpe ya kele na mpasi beno ke nata bawu. Mpe bawu ke telama kuna kaka baminuti fyoti, ke tala nge, mpe ke vutuka mpe ke kwenda vwanda na bakiti ya bawu. Samu na munu, tiya me kufwa! Kima me salama. Beno kuwa! Yina beto ke na nsatu kele reveil, yina misumuki, ke tala na Klisto, ke funguna masumu, ke kima na chaire na maboko na zulu, na kubokaka samu na mawa, mpe dibuundu ya muvimbba ke lema na tiya, na nkembo ya Nzambi.

⁷⁶ Kyese ya beto samu na ntangu ya mbote ya kusala dénomination ya beto kukula, beto me tunga balukolo ya kulutila nene samu na kulongisa balongi ya beto, mpe kufidisa bawu ntama mingi na Nzambi kulutila na yina bawu vwandaka na mbandukulu. Nzambi kele ya kuzabana ve na nzila ya malongi ya lukolo. Yandi kele ya kuzabana ve na nzila ya théologie. Nzambi kele ya kuzabana na nzila ya lukwikilu. Beno lenda ve kutendula Nzambi. Yandi kele ya kuluta lutendulu.

⁷⁷ Beno tala yina ya me sala, beto bantu ya Pantekote bayina vwandaka ya pantekote. Bakento ya beto me zenga bansuki ya bawu; bawu ke pakula. Babakala ya beto ke na kuplesaka muswa na yawu. Balongi ya beto ke na kupesa muswa na yawu. Bawu ke na boma ya kutuba kima na zulu ya yawu. Dibuundu ke tula bawu na ngaanda kana bawu sala yawu. Oh, kana beto kele na nsatu ve ya kusala nkusununu, yina ke katuka na chaire tii na yisi ya yinzo. Ya kele kyadi. Ya kele kukondwa ya lemvo.

⁷⁸ Muntu mosi kwizaka na munu, ntama mingi ve, mpe tubaka, “Mpangi Branham, bantu zola nge.” Kasi yandi tubaka, “Nge ntangu nyonso ke bokaka na zulu ya bawu, ke bokaka na zulu ya bakento ya bawu, samu na nsuki ya kuzenga mpe bima mutindu yina.”

Mu tubaka, “Biblia me tuba ya kele nsoni samu na yandi na kuvwanda na yawu.”

⁷⁹ Yandi ke zitisa ve bakala ya yandi ntangu yandi ke sala yawu. Mpe ya kele kieleka kidimbu ti beno me katukila Nzambi. Beno bambuka moyo, samu na yina me tala Samson, bansuki ya yinda vwandaka kidimbu ya bu-Naziréat ti yandi me katukila yinza, samu na Ndinga ya Nzambi. Mpe ntangu beno ke zenga nsuki ya beno, bakento, beno ke manga ti beno kele kidimbu ya Naziréat. Beno me kwenda na Hollywood na kisika ya kuvutuka na Biblia. Biblia ke tuba, “Ti bawu kuvwanda ya kuzenga nsuki ve.” Beno me mona, ya kele nsoni, mpe balongi ke tuba kima ve na zulu ya yawu.

⁸⁰ Muntu yayi tubaka na munu, “Samu na yinki nge lenda bika ve bakento yayi swi?” Yandi tubaka, “Bawu ke talaka nge mutindu profete.”

Mu tubaka, “Ata mbala mosi ve ti mu me tubaka ti mu vwandaka profete.”

⁸¹ Yandi tubaka, “Bawu ke talaka nge mutindu yina. Longisa bawu mutindu ya kuzwa makabu ya kimpeve mpe kusala kima mosi. Nge fwana kulongisa bawu bima ya nene, bima ya nene.”

⁸² Mu tubaka, “Wapi mutindu mu lenda longisa bawu algèbre na yina bawu zola kwandi ve kulongoka ABC ya bawu, wapi mutindu ya kuzinga mutindu ya kulunga? Wapi mutindu beno ke sala yawu? Yinga, beno kulumuka na kima ya ntete.”

⁸³ Mvula na manima ya mvula, na kuzyetaka na yinsi, mpe ya ke kuma ya kulutila yimbi ntangu nyonso. Ya kele na kima ya yimbi kisika mosi, ya kele na Ndinga ve. Ya kele samu na yina beto lenda ve kupelisa batiya ya reveal. Beto ke na nsatu ya ntangu ya kusala nkusununu. Ata mbala mosi ve Nzambi ke sala yawu tii ntangu beto ke vutuka dyaka. Beto ke na nsatu ya ntangu ya kusala nkusununu.

⁸⁴ Mpe beno babakala, beno ke bika kento ya beno kusala kima mutindu yina, kuvwata bakupe! Ba kele ve ba-Méthodiste, ba-Baptiste. Ya kele bantu ya Pantekote, ya kele kieleka, “mutindu ya kinzambi, Nsungi ya Dibuundu ya Loadika, ya tiya ve madidi ve,” Pantekote ya nkumbu, yimeni. Pantekote kele ve nkumbu, ya kele kimbangi ya mbotika ya Mpeve-Santu, yina ke sukula bantu. Ya kele samu na yina beto lenda ve kuzwa balukutakanu ya nene ya kubeluka ya nzutu mpe nyonso, ya kele na kima ke na kutambula mbote ve kisika mosi. Ya kele Satana, yina me mona beto na ngaanda ke na kumekaka na . . .

⁸⁵ “Kasi, kana beto tuba dyambu na zulu ya yawu, bawu ke soba dibuundi.”

⁸⁶ Beno bambuka moyo, ba ke bondilaka ve Miklisto. Miklisto kele ngolo. Bawu kele babakala mpe bakento ya Nzambi, bayina ke telama samu na Nzambi, ata nyonso yina muntu yankaka

fwana tuba. Beno ke bondila bawu ve mpe kundimisa bawu, mpe kutula bawu mananasi mpe kunangula bawu bisika nyonso. Ya kele bayinti ya fyoti, bayinti ba me vukisa, ya kele ata fyoti mbote ve, ata mbala mosi ve ti yawu ke pesa kima.

⁸⁷ Ya ke bambuka munu moyo, mutindu... Na ntangu fyoti ya ke vwanda ntangu bandeke ke sala bayinzo. Mu vwandaka me tala mwa bandeke bubu yayi, na zulu kuna, mwa banswini kunata matiti na bayinzo ya bawu. Ya ke baka ntangu mingi ve tii bawu ke tunga yinzo, samu na kubuta mwa maki ya bawu. Beno zaba, mwa ndeke lenda kuzwa yinzo ya meki, mpe yandi lenda vwanda na yinzo yango ya maki, mpe yandi ke balula yawu konso baminuti fyoti; yandi ke baka mwa makulu ya yandi mpe ke balula yawu, mpe ke vwanda kuna. Ntangu yayi, kana yandi bika meki yayi kuzwa madidi, na manima yawu me kuzwa mbala mosi tiya, yawu ke pasuka ve. Mpe yandi ke pumbuka kaka mpe ke fulusa madya na yinwa, mpe mbala mosi ke vutuka na zulu ya yawu dyaka.

⁸⁸ Mpe beno zaba, mama ya kukula yina ya ndeke, yandi lenda vwanda kuna na zulu ya meki yango, mpe kubalula yawu konso baminuti zole, mpe ve... ke kumipesama kwandi mpe ke manga kudya tii yandi ke kondé yandi ke lenda ve na kubika yinzo yango. Kasi kana, kuna, mama ya ndeke yina me vukana na ndeke ya bakala ve, meki yango ke butama ve. Ata yina, mutindu beno ke bondila bawu, bawu ke butama ve. Bawu ke vwanda kaka na kati ya yinzo ya ndeke mpe ke pola.

⁸⁹ Mpe kana ya fwana vwanda ntete na ntangu samu na Pantekote na kuzwa Mpangi, Yesu Klisto; samu ti beto ke na kuzwa kima ve kasi yinzo ya bandeke ya kufuluka na meki ya kupola, yina ke na kumanga Lukwikilu, yina ke na kukwenda na Conseil Oecuménique, mpe kubokila yawu bima ya nene, na kuvwanda pene ya pape, mpe kutuba "ya kele kimpeve." Wapi dyambu kele na beno, bantu ya Pantekote? Beno zaba ve ti Biblia kuzonzilaka ti bima yango ke kusalama? Mpe beto ke tuba na ndinga ya ngolo samu ti ba-Méthodiste mpe ba-Baptiste ke kwiza, mpe kuna bima nyonso yankaka yayi ya mutindu yina. Beno ke bakula ve ti na ntangu mwense ya kulala me kwiza sumba Mafuta, ti ya vwandaka ngunga kaka yina Bakala ya makwela kukwizaka? Mpe bawu kuzwaka ve Mafuta! Beno zaba, Enlevement ke salama nakinsweki, mpe ntangu ya kwenda, mosi ya bilumbu yayi, beno ke zaba kwandi ve ti ya me salama. Ya ke sukisa, mpe beno ke kumiyufula yinki me salama.

⁹⁰ Mutindu Jean kwizaka na ntoto. Mpe ba tubaka na Yandi, ba tubaka, "Mbote, Biblia ke tuba, Élie fwana kwiza ntete." Yandi tubaka, "Yandi me kwiza yimeni, mpe beno me zaba yawu ve."

⁹¹ Mutindu mosi ya ke vwanda, kilumbu mosi, bawu ke tuba, "Mu vwanda banza ti yayi zolaka salama ntete ntangu ya Mpasi ya nene. Mu vwanda banza ti Enlevement zolaka salama."

Bampova ke vutuka, "Ya kusalamaka yimeni mpe beno zabaka yawu ve." Uh-huh. Ntangu lendaka vwanda ntama kulutila na yina beno ke na kubanza. Oh, beno vumbuka, dibuundu! Mu ke sala mbote na kusukisa; mu me kwiza awa ve samu na ndongosolo, mu banzaka kaka ti mu ke kotisa yawu kaka samu beno kuzwa yawu na lweka.

⁹² Beno bambuka moyo, mpangi, Satana me mona manaka yayi ya nene, dibuundu mosi ke na kumeka na kusala na kulutila yankaka, dénomination mosi ke na kumeka na kusala na kulutila yankaka, kukatula buzoba nyonso mpe fwana kupesa bawu kizama ya psychologie, kuzwa muntu ya psychologie na kuteza muntu ntete yandi kwenda na bilanga ya kisalu ya kulonga. Pantekote! Ve, yina—yina—yina kele ve ba-Presbytérien, ya kele Pantekote. Nkonga mosi ya bantu ya Pantekote, nkonga ya nene, ke lombaka kizama ya yintu na bamisionnaire ntete na kukwenda na bilanga ya kisalu ya kulonga.

⁹³ Yinki kana bawu kuzwaka kizama ya mutindu yina? Bawu kuzwaka kizama. Ya vwandaka kizama ya bantu ya pantekote na mbandukulu, ntangu ba vwandaka vingila na kivinga ya zulu tii kuna kwizaka Tiya katukaka na Zulu, mpe Ngolo ya Nzambi. Yina vwandaka kizama.

⁹⁴ Ve muntu mosi ya psychologie ya yinza, yina me kola malafu yina me telama kuna ke na kumeka na kuningisa dibanza ya beno, kana beno kele na mwa kilengi fyoti, to kima, yandi ke tuba, "Nge kele nyonso mbote ve." Na yina, kieleka yina ke lakisa ti muntu yina kele kieleka ya kimpeve ke vwanda kidi-kidi, yandi fwana kuvwanda mutindu yina samu na kukota na Yawu. Na yawu beno bawu yayi, beno me mona, mpe ke na kubebisa kaka yina Nzambi me meka na kusala bamvula, mpe ke vutuka kaka na manaka ya bawu mpe ya bawu ya nene... .

⁹⁵ Bawu ke kuzwa ngolo ntangu bawu ke mona bantu mingi ya kuvukana kintwadi. Bawu ke tuba, "Kana mu lendaka kumisa bawu nyonso bantu ya ba-Assemblée! Kana mu lendaka kumisa bawu nyonso bantu ya ba-Unitaire! Kana mu lendaka kumisa bawu nyonso ba-Méthodiste!" Ba-Méthodiste ke na kumeka na kukumisa bawu nyonso ba-Méthodiste, ba-Baptiste ke na kumeka na kukumisa bawu nyonso ba-Baptiste, bantu ya Pantekote bawu nyonso bantu ya Pantekote! Oh, beno lenda ve kusala kima samu na yawu, Nzambi tumaka bima yango katuka mbandukulu ya yinza. Beto fwana kulonga Nsangu ya mbote. Kaka yina. Kasi, manaka ya beto ya nene, beto me kwenda kukondwa Tiya yango. Beto me kwenda mpe me sala beto mosi tiya ya kusala ya yinzo, mutindu ya vwandaka.

⁹⁶ Mpe communisme ya beto, ntangu yayi beto kele na boma mingi, communisme me baka kisika, "Yinki ke salama?" Kasi, beno zaba, kima ya nene kele communisme ve. Beno bika

munu kutuba yawu na beno ntangu yayi, mu ke na boma ya communisme ve.

⁹⁷ Kasi yina mu ke na boma, beno bantu ya Pantekote, Conseil Oecuménique yayi ke baka beno. Kima kele yina. Ya ke sala kidimbu ya kibulu, mpe beno ke lunga kukota na yawu. Samu ti beno kele organisation, beno fwana kukota to kubasika. Kima kele yina, mpe muntu nyonso ya mbote, ya kimuntu, ya kimpeve zaba yawu. Beto ke na nsatu ya kimbangi yankaka na mubu, beto ke na kumona yawu ntangu yayi. Mpe bantu ya beto ya Pantekote, ke mina kaka yawu, ndoba, nsinga mpe kisengo, "Wapi mutindu ya kima ya nene ya ke vwanda." Ntangu, ba-Méthodiste, ba-Presbytérien, bantu ya Luther, dibuundu ya Klismo, mpe bantu ya Pantekote, beno fwana kumanga—kumanga malongi ya beno ya nene ya bantumwa, samu na kuvwanda na kati kuna. Bawu fwana kusala kima mosi. Beno ke kuzwa kima ve ya kusala na kati ya yawu. Ya ke na kukangamaka nyonso na Rome, kieleka kaka yina ke na kulakisa. Masonuku ke tuba yawu.

⁹⁸ Wapi dyambu na milongi yina me bika bima yayi kukota na mutindu yayi, kukondwa kuzabisa bantu? Nzambi ke tula yawu na maboko ya bawu. Kaka na ntangu yayi ya mpasi, ba vwandaka na mpasi, ba vwandaka. Communisme ke na kubaka kisika ve; ya kele Conseil Oecuménique yina ke mina nkonga ya muvimba. Mpe beno bambuka moyo, ntangu beno ke tuba, "Ve . . ." Ya ke salama, kuna ntangu me luta mingi. Beno me sala me baka kidimbu ya kibulu. Kuna beno kele ya yawu.

⁹⁹ Beno ke sala mbote na kukuma kisika beno lenda vwanda ntama ya yawu ntangu yayi, yinga, tata, beno vwanda ya kukangama na kinyemo ya Kimfumu ya Nzambi. Nzutu ya Klismo kele Nzutu ya Kinsweki ya Klismo, yina ke botika na kati ya Yawu na nzila ya Mpeve-Santu; ba ke kotaka na Yawu ve na kuvukana, ba ke kotaka na Yawu ve na nzila ya muntu, ba ke kotaka na Yawu ve na nzila ya kundimisa, ba ke kotaka na Yawu ve na kuzonzaka na bandinga ya malu-malu, ba ke kotaka na Yawu ve na kubokaka. Beno ke butuka na kati ya Yawu, na nzila ya Mpeve-Santu. Ya kele kieleka. Kieleka.

¹⁰⁰ Ntangu yayi beto ke tala bima yayi, mpasi ke kwizaka nyonso na mbala mosi. Oh, dyabulu talaka mpe tubaka, "Uh-huh, bawu me kwenda na kati kuna, ba kele kaka kuna ke na kudumuka mpe ke na kukulumuka, ke na kuboka, ke na kuzwa ntangu ya nene. Nge zaba yinki, awa kele ntangu ya munu ya kudyamisa bawu. Ntangu yayi mu ke vutula bawu yimbi na yimbi."

¹⁰¹ Na yawu yandi me telama na zulu ya mongo mpe me banda na kufula nkasa ya yandi ya mupepe, fiu, "Bilumbu ya bimangu me luta. Na manima ya nyonso, mu ke kwikila ti bantu yayi me vwanda kaka kidi-kidi. Mu banza ti ba fwana kuzwa kizama ya yintu ntete bawu kwenda na bilanga ya kisalu

ya kulonga na bayinsi ya nzenza.” Bantu ya Pantekote! Uh-huh. Beno ke mona nkasa ya yandi ya mupepe kufwa Ndinga, “Oh, mu banza ti Yawu kele kima yankaka, mu—mu ke kwikila yawu...” Beno me mona, ke na kuvutuka kaka mbala mosi manima mutindu bayankaka ya ba-dénomination kusalaka, ya kele kieleka kaka nzila ba ke na kutambulaka. Bawu ke, ya ke kufwa yawu. Ngunga kaka yina beno ke bongisa yawu, yina ke kufwa yawu. Yawu konso ntangu ke vwandaka. Yawu konso ntangu ke vwanda. Ata mbala mosi ve ti yawu ke telama dyaka. Ata mbala mosi ve ti yawu me zabanaka na disolo. Na-na Nsungi ya Dibuundi ya Laodicée yayi, Klisto vwandaka na ngaanda ya dibuundi, ke na kukonkota, ke na kumeka na kukota. Mpe bawu lenda kaka ve kundima Yawu. Bawu lenda ve kuwa Yawu. Ntangu yayi beto ke tala, ngunga beto ke na kuzinga, mpasi me baka kisika.

¹⁰² Mpe kuna beto ke banda na kutala, bimangu kusalama dyaka ve, mutindu ya vwandaka. Bambevo ke vutuka yinzo ya kubela. Ya kele samu na Nzambi ve. Ya kele samu na kukondwa ya reveil na kati-kati ya bantu. Ya kele na ata reveil ve. Bawu—bawu ke vwanda mpe ke kuwa; ke kwenda na yinzo, ke tuba, “Mbote, mu banza ti ya vwandaka kitoko mingi. Uh-huh.” Beno me mona, nsatu ya kulutila ya kusadila Nzambi kele ve. Ya kele ve na kima yango na kati ya bantu yina zolaka vwanda kuna.

¹⁰³ Mu ke na kubambuka moyo bamvula kumi na tanu me luta, awa na Arkansas, ntangu mu vwanda kuzwa lukutakanu ya fyoti na zulu kuna na Jonesboro, ntangu kubika fyoti mafunda makumi yiya ya bantu vwandaka zola kuvwanda na yayi, kwizaka na lukutakanu ya mbanza kubika fyoti ya mafunda kumi na tanu. Mpe ba vwandaka ya kulala na yisi ya batomabilu ya coton mpe nyonso yankaka yina, mpe vwanda simba mikanda na zulu ya bana ya bawu ya kubela, samu kaka na kukota na kati. Ba vwandaka ya kuvwanda na bakiti ya bawu mpe vwandaka zola kukwenda ve, kilumbu mpe mpimpa, mpe vwanda bika ba ya bawu ya luzolo kukwenda kuzwa ba-hamburger mpe mbwata ya boisson gazeuse; mpe bawu vwandaka kuna, kilumbu na manima ya kilumbu, kilumbu na manima ya kilumbu. Bantima ya bawu vwandaka pela, na tiya. Kaka mwa kima ya fyoti Nzambi vwandaka sala, ya vwandaka tula bawu na tiya. Mpe bankama ya bawu kukotaka.

¹⁰⁴ Yandi kele dyaka Nzambi mosi, na nkokila yayi, yina Yandi vwandaka bamvula kumi na tanu me luta. Yandi kele dyaka Nzambi mosi, na nkokila yayi, yina Yandi vwandaka ntangu Yandi vangaka mazulu mpe ntoto.

¹⁰⁵ Kasi yinki ya kele? Beto me vwanda na kyese mpe me zola kutunga ba-organisation ya beto, me zola kutunga *yayi*, mpe kutunga *yayi*, mpe kusala kima mosi ya kulutila nene mpe yina ke ngenga, na kufwanikisaka na ba-Jones, na ba-Méthodiste, na ba-Baptiste, na ba-Presbytérien. Beno kele ve ya bawu. Ve, beno

kele ve. Ba kele bantu ya ba-dénomination, yina kele ya kulunga, kima ya kutelemina bawu kele ve. Ya kele na Miklisto mingi ya mbote na kati-kati ya bawu, kasi beno fwana kuvukana beno mosi ve na bankonga ya bantu yina ke kwikilaka ve. “Bantu yina ke manga Ngolo ya yandi,” beno fwana baka bisika ve na bawu.

¹⁰⁶ Beno zaba, mpasi ya yawu kele, beno ke na kumeka na kuzwa Hollywood na kati ya dibuundu. Kima beno fwana meka na kusala kele kutula Hollywood na nganda ya dibuundu. Beno me mona? Beno ke na kumeka na kusala yinzo ya beno ya nene kuvwanda kitoko mingi, beno ke na kumeka na kusala dénomination ya beno kuvwanda ya nene mingi, tii yawu ke benda dibanza ya bantu. Beto lenda ve kukwenda lweka ya bawu. Beto fwana kuzwa bawu na lweka ya beto. Nyonso ke ngengaka, beno bambuka moyo, Hollywood ke kupela na bima ya yinza, na yina Nsangu ya mbote ke kupela mutindu mwini na kukikulumusa nionso. Ya kele na mwa luswaswanu na kati ya kungenga na kupela mutindu mwini. Nsangu ya mbote ke kupela mutindu mwini na lunangu ve, mpe na lembami, mpe ngolo. Na yina, Hollywood ke na kungenga, mpe bantu nyonso ke na kusala hourra mpe ke na kuboka, mpe ke na kwenda na yawu. Beno me mona? Beto ke na nsatu ya yawu ve.

¹⁰⁷ Beto zola kuzinga luzingu ya Nsemo. Yandi tubaka, “Beno kele mungwa ya ntoto.” “Kana mungwa me zimbisa luwu ya yawu,” yina kele ngolo ya yawu na kati ya Nsangu ya mbote. Beto fwana kuzwa kima kusala na kati ya mabuundu ya beto, yina ba-Méthodiste, ba-Baptiste, ba-Presbytérien, mpe nyonso ya bawu, ke zola kukwiza. Beto fwana vwanda ya mungwa mingi! Mungwa ke nataka mpwila, ke vangaka mpwila. Mungwa kele luwu, kana yawu kukota na kukutana. Yawu fwana kukota na kukutana.

¹⁰⁸ Mpe beto ke mona, banswalu ya beto ya nene kumeka na kufwanikisa na ba-Méthodiste mpe ba-Baptiste, na bayinzo ya nene-nene mpe bisika ya nene, mpe bantu ya kulonguka, mpe balukolo ya kulutila nene mpe balukolo ya kitezo ya zole ya kulutila nene, mpe nyonso ya mutindu yina. Beto me kwenda na nswalu, mpe awa mpasi me baka kisika.

¹⁰⁹ Mpe dibanza ya kimpeve ke tala na nziunga mpe ke tuba, “Awa, beno vingila minuti awa, beto nyonso fwana kukota na Conseil Oecuménique yango? Nkonga ya beto nyonso ya muvimba ke kota na kati ya yawu?” Kieleka, beno fwana. Ya kele kieleka. Beno tala mbote mpe beno mona kana beno ke sala yawu ve. Biblia ke tuba ti beno ke sala yawu, kieleka, mpe Klisto ke vwanda na ngaanda. Ngonda kukumaka yawu mosi ndombi ntete pape kukwiza (ya ntete yina kwendaka ntete ve na Rome), nkokila yankaka yina, samu na kulakisa beno kidimbu na mazulu. Kukondwa ba zonzila yawu ntete, ya kusalaka yawu. Wapi mutindu Mfumu ke na kusalaka bima na kilumbu yayi, ya ngitukulu!

¹¹⁰ Kuna na ngunga yayi ya nene ya mpimpa, ntangu ba vwandaka kuna, mipepe me kwiza. Bivuvu nyonso ya kuzinga dyaka kumanisaka. Ntangu yayi yinki beno ke sala kana dénomination ya beno kukota na Conseil Oecuménique? Yinki ke kusalama kuna na nyonso ya bima ya beto ya nene yina beto me tunga awa na ntoto, kivuvu ya nsuka me manisa?

¹¹¹ Kasi beno zaba, na yina ba zolaka boka, mpe ti bivuvu nyonso vwandaka me manisa, ba zolaka vulusa ve; mpe na mbala mosi, ba monaka Yandi kukwiza, na kutambulaka na zulu ya maza. Na ngunga ya mpimpa, Yandi kwizaka, na kutambulaka.

¹¹² Beno zaba yinki? Ntangu Yandi kubikaka bawu, Yandi zabaka ti ya zolaka salama, na yawu Yandi mataka na mongo ya kulutila yinda yina vwandaka na yinsi. Zulu mingi beno ke kwenda, ntama mingi beno lenda mona. Mpe Yandi kumataka kuna samu Yandi kumona bawu mbote, beno zaba.

¹¹³ Mpe Yandi zabaka ti yayi vwandaka kwiza. Yandi tubilaka na ntwala kilumbu yayi ke vwanda awa. “Mutindu ya vwandaka na bilumbu ya Sodome, mutindu mosi ya ke vwanda na nkzwizulu ya Mwana ya muntu, ntangu Mwana ya muntu ke zabana.” Na yawu, Mwana fwana kuzabana. Nsungi ya yimbi mpe yakinsuza yayi ke lomba kidimbu. Ya ke kuzwa kidimbu. Ya ke manga yawu mutindu bawu kusalaka kuna, kasi ya ke vwanda kidimbu ya kuvumbuka na lufwa. Yandi kele dyaka moyo, ke na kusalaka mutindu Yandi salaka.

¹¹⁴ Beto ke mona, ti na ngunga yayi ya nene, bilandi yango bawu nyonso na mpasi, Yandi mataka samu Yandi kulenda kutala bawu mbote. Yandi vwandaka ya kuvwanda na zulu ya mongo kuna, ke na kutalaka bawu mbote.

¹¹⁵ Mpe awa Yandi me mata mongo ntangu yayi ve, kasi Yandi me mata katuka ndyamu, me mata na mupepe, na zulu ya ngonda, ya bambwetete, tii Yandi kwendaka zulu mingi tii Yandi fwana tala na yisi samu na kumona Mazulu. Mpe kuna Yandi kele ya kuvwanda, na Zulu. Ntangu yayi disu ya Yandi kele na zulu ya nswini, mpe mu zaba ti Yandi ke na kutalaka beto mbote. Yandi ke na kugengilaka.

¹¹⁶ Mpe kaka awa na ngunga yayi ya mpimpa, na yina mabuundu nyonso me kota na manaka ya nene, mpe bawu me kuzwa manaka *yayi* mpe manaka *yina*, nyonso ya kukubika mutindu mabuundu nyonso yankaka, ba-dénomination. Mpe yinki me salama? Na ngunga ya mpimpa, na yina bantu ya kufuluka na kimpeve ke kumiyufula, “Yinki ke salama? Beno tala bana ya munu!” Bakala ke tuba, “Beno tala kento ya munu! Beno tala *yayi!*”

¹¹⁷ Mpe bawu ke manisa na Lumingu, to na lukutakanu ya bisamu ya Kilumbu ya tatu na nkokila, na ntangu ya mbote, samu bawu lenda kukwenda kutala *Beto Zola Sucy*, to kima mosi

mutindu yina, na televizyo. “Bantu ya luzolo ya yinza, kulutila na luzolo ya Nzambi.” Bawu ke sala mutindu bawu.

¹¹⁸ Mu tubaka na mama mosi kilumbu yankaka yina, yandi vwandaka ya kulgata robe ya kukangama na nzutu ya yandi. Mu tubaka, “Mpangi-kento, robe yayi kele mungi ya kukanga nzutu. Ya lendaka wakana mbote ve samu na munu na kutuba na nge yawu, kasi ya kele yawu. Nge kele Muklisto, mpe nge lenda vwanda ditadi yina ke bwisaka bantu.”

¹¹⁹ Yandi tubaka, “Mbote, Mpangi Branham, nge zaba yinki?” Yandi tubaka, “Yayi kele kaka mutindu yina bawu ke na kusala.”

¹²⁰ Mu tubaka, “Ba ke tekisaka dyaka lele, mpe ya kele na bamasini ya kutunga bilele. Ya kele na ata dyambu yankaka ya kutuba ve.” Yinga.

¹²¹ Beno kuwa, bika mu tuba na beno kima, nkundi ya munu ya luzolo. Mu ke na kumangila beno ve. Ve, tata. Mu ke na kumeka na kubumba beno na ngaanda ya nkwanusu. Ntangu nyonso yina mpeve yina kele na kati ya beno, beno ke sala yawu. Ya kele kieleka. Beno fwana kubutuka na ngaanda ya yawu. Ntangu yayi beno lenda sala yina beno zola na dibanza yina, kasi beno bika munu kutuba kima na beno, beno me mona, “Kisika kele ntima ya beno, kuna mpe kele kivwama ya beno.”

¹²² Bika mu tuba na beno. Beno lendaka vwanda ya kuvedila mutindu lis samu na bakala ya beno, mpe beno lendaka vwanda kaka ya kuvedila mutindu lis, ntwenya ya kento, na nduku ya nge ya bakala, kasi kilumbu Nzambi ke lomba beno mvutu na kusalakakinsuza. Beno zaba dyambu ntangu beno ke lwata mutindu yina. Yesu tubaka, “Muntu nyonso yina ke tala kento samu na kulula yandi, me sala kinsuza na yandi yimeni na kati ya ntima ya yandi.” Mpe ntangu bakala yina fwana pesa mvutu, musumuki yina, samu na kutalaka na nge, samu na kusalaka kinsuza na nge, nani pesaka yandi muswa? Beno banza na yawu. Beno bakento ya Pantekote, nsoni na beno! Beno me mona? Nsoni na beno!

¹²³ Mu zola beno, ya kele samu na yina mu ke na kutuba yawu. Zola ke sungikaka.

¹²⁴ Beto kele na kati ya kukondwa ya nene, na kukondwa mosi ya nene ya mvwatulu. Ya kele kaka mutindu, mpe mode mutindu, ya yinza. Yandi tubaka, “Beno kuzola yinza ve, mpe bima ya yinza; kana beno sala yawu, zola ya Nzambi kele kwandi ve na kati ya beno,” mu ke kipe ve wapi mutindu beno ke zonzaka na bandinga ya malu-malu, mutindu beno ke dumuka mpe ke kulumuka, ke bina; ke zenga nsuki, ke lwata ba-robe mutindu yina. Beno babakala ke pesa muzwa na yawu. Bambuma ya beno mosi ke tuba na beno kisika beno kele. Ya kele kaka kieleka. Ya kele kukondwa ntembe beto kele na kati ya muvusu mutindu beto ke na yawu, mpe mipepe ya communisme, mipepe ya kufwanikisa ya mabuundu, mipepe ya organisation ya oecuménisme!

¹²⁵ Ya kele—ya kele ntangu ya kuvukana, ntangu ya kuzonzila bantu. Banzonzi ya bisadi ke na kuyidika bisadi na kimvuka, ba ke na kuswana samu na yawu. Bayinsi me kuzwa Kuvukana ya Bayinsi, ba ke na kuvukanaka. Mabuundu ke na kuvukanaka kintwadi. Yinki nyonso yina ke na kulakisa? Ya ke na kulakisa ti Klisto mpe Kento ya makwela ke na kukubamaka na kuvukana. Ya kele yina yawu ke na kuzonzila. Bivudi nyonso yayi ya bima ke na kulakisa kieleka ke na kukwiza. Beno tala mbote ntangu yayi na yina beto ke na kumanisaka, samu ti mu me baka ntangu mingi.

¹²⁶ Mpe ntangu yayi beno tala, na ngunga ya nene yina ntangu kivuvu nyonso kwendaka, na kuzinga dyaka, ba kumonaka Muntu kukwiza, ke na kutambulaka na zulu ya maza, ke na kutambulaka. Mpe kima, dyambu ya mawa, beno kuwa mbote, kima kaka yina zolaka sadisa bawu, bawu vwandaka na boma. Ba tubaka, “Ya ke talana mutindu dyabulu. Ya lendaka vwanda, beno zaba, mpeve.”

¹²⁷ Ya kele yina ke salamaka dyaka! Bawu kele na boma ya Yawu. Ba ke na boma ya kubikula, ba ke na boma ya mutindu mosi ya mwa- ngolo ya dyabulu; ntangu Yesu tubaka Ya ke salama na kilumbu yayi. Kima kaka yina lenda kusadisa bawu kele Yesu Klisto. Dénomination yankaka ve, kuvukana ya kintwadi ya bawu nyonso yina ve; yina ke kumisa yawu kaka yimbi mingi kuluta yina vwandaka ntete. Kima kaka yina lenda kusadisa beno kele Yesu Klisto.

¹²⁸ Mpe na yina Yandi silaka kuvutuka na bilumbu ya nsuka, na nzutu yayi, mpe kusala yayi, na kusilaka (kaka mutindu ntete mwana ya nsilulu kuvutuka na Abraham, nkuna ya ntete) nkuna ya kintinu ya Abraham, Yesu zolaka... tubaka ke mona kima mosi. Ntete Mwana ya nsilulu, Nzambi ke monana Yandi mosi na nzutu mpe ke sala kaka mutindu Yesu kusalaka, mutindu Yandi tubaka Yandi zolaka sala, kaka mutindu tubaka ke salama na bilumbu ya nsuka. mpe awa bansilulu nyonso yayi, yina beto lenda tanda, na binkunku ya kumi na zole, kaka awa na ntwala ya beno, ti yayi fwana kusalama.

¹²⁹ Mpe mabuundu, yina zolaka vwanda na maboko ya kufunguka, samu na kuyamba Yawu, “Mu ke na mwa boma ya Yawu. Ya kele ya nkonga ya beto ve, beno me mona.” Mpe bawu kele na boma ya Yawu. Kima kaka yina lenda nata bawu na Klisto, ya kele Klisto Yandi mosi, mpe bawu kele na boma ti Yawu ke sala boma. “Oh, mu zaba ve. Ya lendaka vwanda ya kufuluka na bampeve, beno me mona. Mpe mu zaba Yawu ve.” Boma ya kima kaka yina lenda sadisa bawu.

¹³⁰ Mpe na kati ya ngunga ya mpimpa ya mpasi yina, dibuundu ya kusoola yango, nkonga yina vwandaka na ngaanda kuna, vwandaka na boma ti ya lendaka vwanda dyabulu, ba vwanda

zola ve kuzwa kima ya kusala na yawu. Kuna me kwiza Ndinga yango ya kitoko, “Beno vwanda na boma ve. Ya kele Munu.”

¹³¹ Yandi kele Ndinga. Yandi kele Yina ve? Ata mbala mosi ve ti Yandi me sobaka, na kuvwanda Ndinga. Ntangu yayi beno lenda kuwa ve Ndinga kutuba, na nkokila yayi, “Yandi kele mutindu mosi mazono, bubu yayi, mpe kukondwa nsuka. Beno vwanda na boma ve; ya kele Munu”?

Beto kulumusa bayintu ya beto.

¹³² Tata ya beto ya Mazulu, nkokila yayi kele tiya mingi. Bangunga kele mpimpa, mutindu ti Tiya me katuka na chaire. Beno ke na kulokuta bisika nyonso ya bilanga bambuma. Beno ke tuba, “Kimfumu kele mutindu muntu yina me baka lukosi mpe yina me kwenda na mubu, me losa yawu na kati, mpe ntangu yandi me basisa yawu. Kimfumu vwandaka mutindu yina.” Mfumu Nzambi, kilumbu mbisi ya nsuka yayi yina kele na kati ya maza! Nge tubaka, “Ba bakaka mitindu nyonso.” Lukosi yango ya Nsangu ya mbote ke bakaka mitindu nyonso; ya bakaka bamfulututu, ba kosa-kosa, bankala-bumi, banyakka, bambisi vidangeur. Beto zaba ve yinki yawu kubakaka, kasi ya vwandaka na mbisi mosi kuna yina Nge vwanda landa. Nge kele Yina kele Zuzi. Kasi beto bakulaka, na nswalu nyonso bamfulututu, ba kosa-kosa, mpe nyonso, ke vutuka na nzungu dyaka, ke vutuka na bamaza. Kasi kilumbu mbisi ya nsuka yango yina ba tumaka, yina ba soolaka ntama na kukwiza, kitini ya nsuka ya Nzutu yango, ke basika na dyanga yina.

¹³³ Nge losaka lukosi na bilumbu ya Luther, mpe ya Wesley, ya Alexandre Campbell, ya John Smith, ya Calvin, ya Knox, ya Finney, ya Sankey, na nyonso yina; na nsungi ya Pantekote, na bilumbu ya F. F. Bosworth, mpe Frochman, bantu ya nene yina. Nge losaka balukoti, na bilumbu ya Billy Sunday, nzila nyonso ya nsungi.

¹³⁴ Mpe ntangu yayi Nge ke dyaka na kufyongonina na mubu. Ya kele na mosi ya bawu ya kuvwanda awa na nkokila yayi, Mfumu? Kana ya kele, ti ba vwanda mutindu mwa kento yina na dibulu ya maza. Ata kitezo ya yandi ya kinsuza, yandi zabaka dyaka ti Nge vwandaka Mesiya. Yandi monaka kidimbu yango. Yina sukisaka yawu. Yandi tubaka, “Mu ke mona ti Nge kele profete.” Yandi vwandaka na ata dibanza ve ti ya zolaka vwanda Mesiya. Yandi tubaka, “Beto ke na kuvwingila Mesiya,” na nzonzolo yankaka. “Beto zaba ntangu Mesiya ke kwiza, Yandi ke tuba na beto bima yayi.” Mpe Nge me tuba, “Mu kele Yandi.” Yina sukisaka yawu.

¹³⁵ Ntangu yayi, na nkokila yayi, Mfumu, bika bawu kumona ti, “Ya kele Munu; beno vwanda na boma ve. Ya kele nsilulu ya Munu.” Belusa bambevo, Mfumu, vulusa bayina me zimbana, fulusa bayina kele maboko mpamba.

¹³⁶ Bika beto kuvutuka na nkokila yayi, mpe kutuba na bantima ya beto, na yina beto ke na kuvutuka, mutindu bayina katukaka

na Emmaüs, “Bantima ya beto vwanda pela ve na kati ya beto na yina Yandi vwandaka longa beto na nkokila yayi na kati ya yinzo ya nene, Mvwandulu ya Yandi ya Kinzambi!” Mutindu bawu kuzabaka ti ya vwandaka Nge, bawu kubokilaka Nge na kati mpe meso ya bawu kufungukaka. Ti konso mosi ya beto, na nkokila yayi, kubokila Nge na kati. Kana beto ke bakula Yawu ve, ti beto kubokila Nge na kati, na mutindu nyonso. Yina kele mutindu kaka yina Nge lenda kumonana Nge mosi.

¹³⁷ Mpe beto me tala mutindu Nge kumonanaka Nge mosi na manima ya mvumbukulu ya lufwa ya Nge, Nge salaka kima na mutindu mosi Nge salaka ntete ba koma Nge na kulunsi. Ntangu yayi kwiza na nkokila yayi, Mfumu, Nge tubaka ti Nge vwandaka “mutindu mosi mazono, bubu yayi, mpe kukonda nsuka.” Sala dyaka, samu na beto, mutindu Nge salaka na bilumbu ntangu Nge telamaka awa na nzutu, na zulu ya ntoto. Beto ke kwenda na yinzo, bantima na kyesé, mutindu bayina. Na Nkumbu ya Yesu beto me sambila. Amen.

¹³⁸ Ntangu yayi na lukutakanu, na nkokila yayi, mu zaba ti tiya kele mingi, mpe beto kele na baminuti makumi zole me bikana samu beto kubasika na ngunga ya mbote. [Kisika ya mpamba na bande—Mu.] Mu . . .

¹³⁹ Mu lenda suka ve to kukanga bima yina mu ke salaka. Mu kele ya kunatama na Kima mosi, mu kele ntangu nyonso, luzingu ya munu nyonso, mpe ntangu nyonso Yawu ke vwandaka kieleka. Ata mbala mosi ve ti Yawu me tubaka na munu kima kasi yina vwandaka na kati ya Biblia. Mu lenda kanga yawu ve. Mu lenda sala kima ve samu na yawu. Ya ke sala kaka yawu, na mutindu nyonso. Mpe mu ke na kivuvu, kana mu me tumama, ya ke na muntu ke na nsatu ya yawu. Mpe mu ke vwanda ya kukwikama. Mpe na Kilumbu yango, mu zola, mutindu Santu ya nene Paul kutubaka, “Ata menga ve ya muntu kele na diboko ya munu.” Huh-uh. Mu—mu zola kutuba na beno Kieleka. Ve mutindu mu . . . Mu zola beno.

¹⁴⁰ Mpe kana beno vwandaka na mwa mwana ya bakala . . . Ntangu yayi banza na yawu, kento, nge yina mu vwandaka me semba ntama mingi ve, beno bampangi ya bakento na nsuki ya kuzenga mpe nyonso. Kana mu . . . Kana beno vwandaka na mwa mwana ya bakala ya kuvwanda na bala-bala, mpe beno kutuba, “Junior, ya zola, nge ke sala mbote na kukwiza na kati, ya zola. Ya lenda vwanda, mu zaba ve, ba lenda dyata nge.” Beno zola mwana yina ve. Ya kele kieleka. Beno ke basika kuna mpe ke pesa yandi fimbu, to ke sala yandi kukota na ngolo. Ya kieleka. Beno zola yandi.

¹⁴¹ Ya kele mutindu Nsangu ya mbote kele. Nzambi zola beno. “Mpe bayina Yandi ke zolaka, Yandi ke bulaka mpe ke sembaka konso mwana yina ke kwizaka na Yandi.” Kana beno lenda ve kundima mfimbu, ti beno kwenda mpe beno kudasuka samu

na yawu, kuna beno kele bana ya makangu, beno kele ve bana ya Nzambi. Na yawu beno bambuka kaka moyo, ya kele kaka Masonuku.

¹⁴² Ntangu yayi mpova mosi ya Yandi, mpova mosi, ke zola kutuba mingi kulutila na yina mu lendaka tuba, fuku mosi ya baluzingu. Ya kele Yandi. Beto zaba nsilulu ya Yandi. Beto zaba yina Yandi silaka na kusala. Ntangu yayi mu zaba ve kana... ti... beto ke katuka...

¹⁴³ Beno kabulaka dyaka bakalati? Beno kabulaka bakalati bubu yayi? Ya vwandaka yinki? J, mbote mingi. Mbote mingi, samu na kulanda ntangu, beto ke banda kaka na numelo ya ntete. Ntangu yayi, ba lenda vwanda bisika nyonso na kivinga. J, numelo ya ntete.

¹⁴⁴ Mpe ntangu yayi beto ke bakaka yawu mutindu nyonso. Beto bandaka, kilumbu mosi, katuka lweka *yayi*, na manima ya bilumbu, bantangu yankaka beto ke vutuka mpe ke kwenda na ntwala, mpe ke sala nziunga, kasi beto ke baka bawu mutindu nyonso awa. Kasi konso muntu yina ke kota, konso kilumbu, ke na siansi ya kuluta na mulonga. Ya zola tuba ve samu beno kele awa...

¹⁴⁵ Bantu yikwa zaba, na ndandanu ya balukutakanu yayi, ya vwandaka pene bambala zole ya bantu kubelukaka na kati ya yinzo, kulutila na yina kubelukaka na zulu awa? Kieleka beno zaba yawu. Beno me mona, kalati ya bisambu ke salaka kaka bantu kukwiza na zulu awa, samu Mpeve-Santu kukwiza na kati-kati ya bawu, samu ti ya kele mutindu beno ke salaka yawu. Beto kele ve na nsatu ya kusala yawu na ntangu yayi. Beto lenda bika bakalati ya bisambu.

¹⁴⁶ Kaka mutindu beto salaka nkokila ya mazono, beto kuzwaka ve bakalati ya bisambu mazono na nkokila. Mpeve-Santu kwendaka na kati-kati ya bawu yina vwandaka ve na bakalati ya bisambu. Mpe mu monaka bima mingi yina mu tubilaka kima ve, samu ti mu vwanda zaba ve kana ya vwandaka yawu to ve. Ya vwandaka dyaka mpimpa na zulu ya bawu, mpe mu bikaka kaka yawu. Mu zabaka ve. Ya zolaka sala ata mbote ve na kubokila bawu. Nyonso yina Yandi ke tuba kele ya kulunga, na yawu beno kuwa yina Yandi ke tuba.

¹⁴⁷ Ntangu yayi beno me tuba ti ya vwandaka J? J, numelo ya ntete. J, numelo ya ntete, nani ke na kalati ya bisambu, beno telemisa diboko ya beno. Beno fwana me zimbana, mwana; ya fwana vwanda... Oh, beno lemvokila munu. Oh, kuna na manima na kibaka. Beno kwiza na zulu awa, kento. Ba—ba me nata kaka bakalati yayi awa ntangu yayi, bakala, Mpangi Borders to Billy, mosi, bantangu yankaka bawu zole, bawu me yukisa bakalati yango na ntwala ya beno, mpe kuna ke pesa beno bakalati ya beno, nyonso yina beno zola. Beto zaba ve, ba kele kaka... Yandi *yayi* lenda kuzwa numelo tanu, mpe yandi *yina*

kuzwa numelo sambwadi, yandi *yayi* kuzwa numelo kumi na tanu, mpe yandi *yina* makumi yivwa na tanu, mpe beto zaba ve. Mpe kuna, dyaka, ntangu mu ke kwiza, mu kaka, nyonso yina ke vwanda na ntima ya munu, mu ke bokila kubanda kuna, ata kisika ya kele. Mu kaka . . . Kana mu tuba . . . Bantangu yankaka mu ke tanga lutangu ya kele na mulonga, mpe kukabula yawu na bayayi na ndonga yayi mpe kuzwa mvutu. Beno me mona? Mpe dyaka, kana ve, mbote, mu kaka . . . nyonso yina ke kwiza na yintu ya munu ntete, mu ke bokila.

¹⁴⁸ Numelo ya ntete. J, numelo ya zole. Numelo ya zole, numelo ya tatu, numelo ya yiya, numelo ya tanu, numelo ya sambanu, sambwadi, nana, yivwa, kumi, beno bika bawu kukwiza, beno me mona. Mosi, zole, tatu, yiya, tanu, sambanu, sambwadi, nana, yivwa, kumi. Ya kele mbote. Ya kele mutindu yina, beno kwiza kaka . . . Beno vingila, mosi me kwenda lweka yankaka. Mu vwandaka . . . Mosi, zole, tatu, yiya, tanu, sambanu, sambwadi, nana, yivwa, kumi. Ya kele ya kulunga. Ntangu yayi, awa, yandi yayi awa, kumi. Mbote mingi.

¹⁴⁹ Kumi na mosi, kumi na zole, kumi na tatu, kumi na yiya, kumi na tanu. Ya kele tanu ya kulutila. Mosi, zole, tatu, yiya, tanu. Mbote, ya kele mbote.

¹⁵⁰ Kumi na sambanu, kumi na sambwadi, kumi na nana, kumi na yivwa, makumi zole. Mosi, zole, tatu, yiya. Mu ke na kumona kaka yiya. Makumi zole, makumi zole me pesa mvutu? Mbote mingi. Ntangu yayi, beto zola kuzwa mingi ve ya kutelama na mbala mosi. Ntangu yayi kana beto manisa na bayayi, mpe ti ntangu kele dyaka, beto ke bwela dyaka. Beto ke bokila ve . . . Ya lenda vwanda ti beto . . .

¹⁵¹ Beto meka na kubaka fioti dyaka. Beto meka na kubaka diaka tanu. Makumi zole na mosi tii na makumi zole na tanu, ya J, beno bika bawu kutelama kana beno zola. Makumi zole na mosi tii na makumi zole na tanu. Mosi, zole, tatu, kuna na manima, yiya. Mosi, zole, tatu, yiya, yina kele tanu. Ok, ntangu yayi beto suka kaka kisika yina. Ya kele na makumi zole na tanu na mulonga, mpe ba kele—ba kele na ndonga awa.

¹⁵² Ntangu yayi mu ke lomba na beno lemvo mosi. Beno lenda pesa munu nyonso . . . Beno pesa Nzambi dibanza ya beno nyonso, samu na baminuti kumi na tanu, kumi na sambanu yina ke landa. Beno zola kusala yawu? Mpe beno zola kusala yayi, kufungula ntima ya beno? Ntangu yayi beno bambuka moyo na yina mu vwandaka me tuba. Beno bika yawu ve kubwa na manima ya beno, mutindu maza ke kubwaka na manima ya kivadangu, mutindu kingana ya ntama ke tubaka. Beno sala yawu ve. Beno banzila na Yayi.

¹⁵³ Kana mu tuba na beno kima yina kele ve na kati ya Masonuku, mpe nsilulu ya ngunga yayi, beno kele na muswa ya kukwenda mona mfumu ya kisalu awa mpe kukwiza tuba

na munu yawu. Ya kele kieleka. Mu—mu ke longaka kima ve kana yina kele na kati ya Ndinga. Mpe kana mu vwanda kaka na Ndinga yango, mpe kana mu tuba Yawu kele mutindu yina, mpe Nzambi . . . Ya kele na kati ya Biblia. Kana Wanzio ya Mfumu kutuba na munu kima yina kele ve na kati ya Biblia, ya ke vwanda ve Wanzio ya Mfumu. Ya kele kieleka. Yandi ata mbala mosi ve me tubaka na munu kima kasi yina vwandaka na kati ya Ndinga, mpe beno kele bambangi. Yandi me tubaka ata mbala mosi ve kima mosi, na lutangu ya bankama ya mafunda mpe mafunda, mpe bandinga ya yinza, ti Yandi me tubaka ata mbala mosi ve kima ya luvunu, to tubaka kima yina kusalamaka ve.

¹⁵⁴ Beno kuwa. Beno yufula mfumu ya kisalu mpe bayankaka awa. Yayi beno nyonso ke mona awa, kele kaka lweka ya kukondwa kulunga. Ya kele ya kulunga, bampangi? [Bampangi me tuba, “Kieleka.”—Mu.] Oh, kuna, mpe kuna na luzingu ya kingenga, kisika Yandi ke tuba, “Kwenda na kisika *yayi*, mpe nge ke mona *yayi*. Mpe *yayi* ke salama. Mpe tuba *yayi* awa, na lweka *awa*.” Ya ke salamaka kaka bambala mingi, ntangu nyonso, beno me mona, mvula ya muvimba. Bantu na kati ya dibuundu ke monaka kaka bima ya fyoti. Kasi ntangu *yayi* kana beno lenda vwanda na buzitu.

¹⁵⁵ Ntangu *yayi* bantu nyonso yina kele na kati ya mulonga ya bisambu *yayi*, ya kutelama awa, kele banzenza samu na munu? Beno telemisa maboko ya beno kana beno kele yawu. Mbote mingi. Bantu yikwa kuna kele, zaba ti mu zaba kima ve na zulu ya beno? Beno telemisa diboko ya beno. Ntangu *yayi* na *yina* . . . Matondo na beno. Mu ke kipe ve kisika beno kele, kana beno kele na zulu na balko, ya kupesa manima na kibaka, na lweka *awa*, ata wapi kisika beno kele. Mu ke . . .

¹⁵⁶ Ntangu *yayi*, *yayi* kele samu na bumbote ya beno. *Yayi* kele samu na ndandu ya beno ya mbote. Beno me mona, *yayi* kele samu na ndandu ya beno ya mbote.

¹⁵⁷ Mu vwandaka banza ti ya vwandaka mutekolo ya munu ya bakala yina vwandaka zonza na munu kuna, kasi ve. Mu ke na mutekolo ya munu ya fyoti na kati awa kisika mosi, na nkokila *yayi*, yandi kele na kutala na ntela mutindu mosi, mpe mu vwanda banza ti ya vwandaka Paul ya fyoti. Yandi ntangu nyonso ke tubaka yandi ke kwiza, telama na estrade, ke longa samu na munu, mpe yandi kele kaka na bamvula zole. Mu banza ti mwa mwana ya bakala yango ke na kusosaka mama ya yandi.

¹⁵⁸ Na yawu beno bambuka moyo, mu ke na kumeka na kusadisa beno. Mu . . . Nzambi zaba yawu. Mu ke na kumeka na kusadisa beno, beno me mona. Ntangu *yayi* beno tala, mu zola beno kuzwa ndandu ya mbote, kana Yandi kwiza na kati-kati ya beto.

¹⁵⁹ Ntangu *yayi* beno banza na yawu, Muntu ya Yesu Klisto ke na kusala na kati ya nzutu, mutindu Yandi silaka Yandi zolaka sala na nsuka. Bantu yikwa zaba ti Yandi silaka yawu? Kaka mutindu

ya vwandaka kuna na Sodome, ntangu Wanzio na kuplesaka mukongo ya Yandi, mpe... Yina vwandaka Nzambi. Beno ke kwikila ti ya vwandaka Nzambi? Bantu yikwa ke kwikila ti ya vwandaka Nzambi? [“Amen.”] Kieleka, ya vwandaka. Biblia ke tuba ti ya vwandaka. Mpe Yandi, Yesu, vutukilaka na yawu. Ntangu yayi beno tala.

¹⁶⁰ Ntangu yayi beno bayina kele kuna kukondwa kalati ya bisambu, mu zola beno kusala kima samu na munu, ata kisika beno kele. Ntangu yayi beno bambuka moyo, bima yayi, beno tala mbote ntangu Yandi ke tuba na beno ti beno me beluka, to yina Yandi ke tuba na beno na kusala. Beno tala mbote yina Yandi ke tuba. Kana Yandi tubaka kaka na beno, yina kele samu na kutunga lukwikilu ya beno. Mpe na yina ntangu lukwikilu ya beno ke kuma na kisika mosi, beno telemisa kaka diboko ya beno mpe beno ndima Nzambi. Ya kele munu ve, samu ti Tata ya Mazulu zaba.

¹⁶¹ Mu ke tala na yisi na mulonga awa, mu ke mona muntu mosi ve yina mu zaba. Mu lenda kumona ve kasi na kutala bantu zole to tatu na kati ya dibuundu ya yinzo, yina mu zaba. Mpe mu zaba ve na yina, kaka ntangu yayi, mu lenda tuba, kulakisa mosi. Mu zaba ti Edmund Way vwandaka awa baminuti fyoti me luta. Mu vwanda banza ti mu monaka yandi, mpe mu—mu me zimbana...

¹⁶² Kana mu me zimbana ve, mu ke na kumona muntu mosi mu zaba, ya kele bakala mpe kento ya yandi, na mwa mwana ya kento, ya nkumbu Fritzinger, yina me katuka kuna na Ohio. ya kele, nge kele mpangi—Mpangi Fritzinger? Beno kele ya kuvwanda na mutindu ya mwa nsongi kisika... Yina kele Mpangi ya bakala mpe Mpangi ya kento Fritzinger, yina me katuka Ohio, bankundi ya munu.

¹⁶³ Mpe na lweka yankaka ya yawu, ya kuvwanda na manima, ya kele... Mu ke mona na lweka awa, ya kele kiboba ya bakala yina ke na kukuma na bamvula makumi yivwa na zole, na nkumbu ya William Dauch. Yandi na kento ya yandi. Kento kele infirmière. William Dauch, na Ohio, nkundi ya munu mosi ya kieleka. Ntama mingi ve, yandi kuzwaka, bamvula makumi yivwa na mosi, ntima ya muvimba kukangamaka yandi, ntima kukangamaka, mpe kento ya yandi kubokilaka munu, na kukwiza na nswalu, yandi vwanda kaka kuna. Mpe na...

¹⁶⁴ Yandi me vwanda nkundi ya kieleka samu na munu. Na nzila ya munu na kukwenda mona yandi, mu vwanda na boma. Mpe mu telamaka, mpe mosi ya makulu ya munu ya ditoma kutengamaka, ya vwanda pasula kaka pine ya munu, mpe mu kwendaka na station ya Texaco, samu na kutula lusanse, mpe bawu basikaka, vwandaka tala yawu. Mpe mu me nangula meso, mpe mu me mona Mpangi Dauch vwanda belama na dibuundu ya munu, vwanda pesa munu mbote ya diboko. Mu tubaka, “Lukumu na Mfumu.” Mpe mu me baluka na kutala na lweka

yayi, mpe awa yandi vwandaka kwiza na bala-bala, mpe me baka diboko ya munu. Mu kwendaka na yandi.

¹⁶⁵ Mu monaka dokotolo ya yandi, Juif ya ntwenya, to muntu ya kati-kati ya bamvula, Juif ya bakala. Mpe mu tubaka, “Wapi mutindu samu na yandi, dokotolo?”

¹⁶⁶ Yandi tubaka, “Yandi kele kwandi ve na siansi ndambu.” Yandi tubaka, “Yandi kele na yisi ya tenta ya oxygène.” Yandi tubaka, “Yandi ke kufwa kaka kuna.” Yandi tubaka, “Bambuka moyo, yandi kele na bamvula makumi yivwa na mosi.”

Mu tubaka, “Yinga, tata.”

¹⁶⁷ Yandi tubaka, “Ya kele kukangama ya ntima ya muvimba. Kima ve ba lenda kusalama.” Yandi tubaka, “Ya kele ntangu ya yandi ya kukwenda.”

¹⁶⁸ Mpe mu tubaka, “Yinga, tata. Kasi, ve, yandi ke kwenda ve. Kaka yina.”

¹⁶⁹ Mu me kota, me kotisa diboko ya munu na yisi ya tenta. Mu me tuba, “Mpangi Dauch, nge lenda kuwa munu?” Yandi me nangula meso na munu. Yandi kele Allemand, ntangu yayi na kieleka, nkumbu ya yandi kele D-a-u-g-h, mpe mu ke tangunaka yawu Dauch, beno me mona. Mpe mu—mpe mu me kotisa diboko ya munu na yisi ya tenta, mpe mu tubaka, “Nge ke kuwa munu, Mpangi Dauch?”

Yandi tubaka, “Yinga.”

Mu tubaka, “Nge ke kwenda ve. Mu me mona nge ke kwenda ve.”

¹⁷⁰ Na manima ya lumingu mosi, mu vwandaka ya kutelama na dibuundu ya munu, nani vwandaka belama na dibuundu kasi Mpangi Dauch! Mu me manisa lukutakanu mpe me kwenda na lweka ya nzadi, na cafétéria, samu na kudya. Mpe na yina mu me basika na ditoma, mpe vwanda tambula na bala-bala, awa me kwiza Mpangi Dauch na diboko ya kutandama. Ba-vision yango ke kondwaka ve.

¹⁷¹ Mpe bakala yayi ya bamvula makumi yivwa na mosi, mpe yandi ke landaka balukutakanu nyonso, yandi vwandaka na Californie. Nge zola kwandi kutelemisa kaka diboko ya nge, Mpangi Dauch, ya kuvwanda kuna, samu ti bantu kumona yina soda ya kieleka kele ntangu yayi. Awa, ya kuvwanda kaka awa, beno me mona, ya bamvula makumi yivwa na mosi, mpe yandi ke landaka balukutakanu nyonso. Ntangu mu ke vwandaka na tabernacle, yandi ke tambula na ditoma bankama ya bitamina konso kilumbu, samu na kwiza kuwa munu kulonga mwa dilongi, mpe kuvutuka. Nzambi, “Ya ke vwanda na Nsemo na ntangu ya mpimpa.”

¹⁷² Mu tubaka, kilumbu yankaka yina mu vwanda zonza na yandi, mu tubaka, “Yinki mu lenda sala samu na nge, Mpangi Dauch?”

¹⁷³ “Ndombolo kaka mosi, Mpangi Branham. Ntangu Yandi ke kwiza, mu zola kukwenda na Yandi.”

¹⁷⁴ Mu tubaka, “Vwanda na boma ve. Ya me salama yimeni. Kieleka.” Ntangu yayi, bakala yayi kwizaka, kuzwaka mbotika, oh, kwizaka mpe kuzwaka mbotika ya Mpeve-Santu mpe nyonso, kaka kisadi mosi ya Klisto ya mbote mingi.

¹⁷⁵ Ntangu yayi mu ke lomba na muntu nyonso, na kuvwanda kieleka na buzitu, beno tala lweka yayi mpe beno sambila.

¹⁷⁶ Ntangu yayi milongisi yikwa awa zaba ti Yandi kele Mfumu Nganga-Nzambi, kaka ntangu yayi, yina lunga simbama na bansatu ya bimbevo ya beto? Mbote, kana Yandi kele mutindu mosi mazono, bubu yayi, mpe kukonda nsuka, mpe Mfumu Nganga-Nzambi mosi, Yandi ke sala mutindu mosi. Kaka, Yandi, nzutu ya Yandi kele na . . . na Kiti ya kimfumu ya Nzambi. Bantu yikwa zaba yawu? [“Amen.”] Nzutu ya Yesu kele na zulu ya Kiti ya kimfumu ya Nzambi. Kasi Yandi ke bakaka nzutu ya beto samu na kutalana Yandi mosi, kaka mutindu Yandi silaka na kusala. “Bisalu yina Mu ke salaka beno mpe ke sala.”

Mu ke lomba beno na kuvwanda ya kuvwanda swi, na kuvwanda na buzitu, beno lala ve, beno sambila.

¹⁷⁷ Ntangu yayi, Tata ya Mazulu, mu me meka na kuvwanda na buzitu mutindu mu zaba na kusala, samu na yawu. Ntangu yayi kaka mpova mosi ya Nge ntangu yayi, Mfumu, mpe dyaka kukondwa makelele, ti Ndinga ya fyoti kukulumuka na kati ya bantu mpe kutuba, “Ya kele Munu; beno vwanda na boma ve.” Pesa yawu, Tata. Mpe mu me kumipesa munu mosi na Nge, na Nsangu yina me longama na nkokila yayi, na Ndinga ya Nge samu na kusiamisa. Nge lenda to ve kusala yawu. Kasi kana Nge ke sala yawu, to Nge kusala yawu, samu ti Nge silaka na kusala. Mu ke sambila ti Nge ke pesa yayi, na Nkumbu ya Yesu. Amen.

¹⁷⁸ Mpe muntu nyonso kuvwanda kieleka na buzitu, kieleka kaka na buzitu. Mbote? Ntangu yayi mu ke pesa beno Masonuku na yina beto ke na kulandila. Kana Mfumu ke sala, mu zaba ve. Kasi . . . Mpe mu me longa mutindu yina, beno me mona, ya kele mutindu mosi ya kukusa. Yayi kele mutindu yankaka ya kupakula. Ya vwandaka kaka lusakumunu. Yayi, kaka kima mosi, ke baka kaka luzingu nyonso ya beno.

¹⁷⁹ Ntangu yayi mama ya kutelama awa. Ata mbala mosi ve mu me monaka yandi na luzingu ya munu. Beto kele banzenza? Mu banza ti nge vwandaka me tuba, ntama mingi ve, ti mu zaba nge ve. Nzambi zaba nge. Yandi zaba munu. Nge zaba ti yina beto kele ya kutelama awa ntangu yayi, beto ke pesa mvutu samu na yawu na Kilumbu ya Lusambusu? [Mpangi-kento me tuba, “Amen.”—Mu.] Nge zaba yawu? Nge zaba ti yina beto ke na kusala ntangu yayi, Nzambi ke sala beto kupesa mvutu samu na yawu na zulu kuna? Mu me tuba yawu samu na kikuma mosi. Ntangu yayi, kana Mfumu Yesu kulakisa na munu yina

nge ke na kusala, yina kele na kati ya dibanza ya nge, to kima mutindu yina, nge ke kwikila yawu? Nge ke kwikila kaka na yawu, mutindu yina ve? [“Amen.”]

¹⁸⁰ Beno ke kwikila yawu kuna, beno dibuundu?

¹⁸¹ Ntangu yayi beto ke telama kieleka kaka mutindu kento yina na dibulu ya maza, mpe Mfumu ya beto, bakala mpe kento yina kukutana ya bawu ya mbala ntete. Beno me mona? Beto bawu yayi, kukutana samu... Ya kele Santu Jean kapu ya 4. Ntangu yayi kana Mpeve-Santu kutuba... Kana nge kele awa samu na muntu yankaka, kana nge kele ya kubela, kana ya kele dyambu na yinzo, kana ya kele mambu ya mbongo, nyonso yina ya kele, mu zaba ve. Kasi Yandi zaba. Kasi Yandi lenda tala mabanza yina kele na kati ya ntima ya nge. Yandi kele Ndinga. Mu zaba ve. Mu kele muntu. Nge kele kaka mwa ya kudasuka, mpe ya kele samu na yina mu ke na kusalaka yayi, nge me mona.

¹⁸² Ya kele mosi ya mambu ya nge, ya kele kudasuka. Ya kele kieleka. Mpe nge kele dyaka na diabète, ya kele kima yankaka yina kele mbote ve na nge. Ya kele kieleka. Poto-poto mingi, bima mingi kaka kele mbote ve. Ya kele kieleka? Kana ya kele kieleka, telemisa diboko ya nge. Beno me mona? Nge ke kwikila ti Yandi ke belusa nge? [Mpangi-kento me tuba, “Mu ke kwikila.”—Mu.] Nge ke kwikila? Ntangu yayi, kudasuka ya nge kele samu na mvula ya nge, nge me mona, kasi ntangu yayi yawu nyonso ke katukila nge. Mpe mu ke kwikila ti na lukwikilu beto ke kwenda na Calvaire, na kuzwa kuvutula ya Menga.

¹⁸³ Ntangu yayi, ya kele kaka kieleka yina Yandi salaka. Yandi tubaka na kento na dibulu ya maza yinki vwandaka dyambu ya yandi. Ya yandi vwandaka babakala mingi. Ya nge vwandaka yinki... Mu banza ya vwandaka kudasuka, mpe bima zole to tatu ya kulutila yina vwandaka tambula mbote ve na nge. Ya kele kieleka, mutindu yina ve? Ya kele kima mutindu mosi.

¹⁸⁴ Ntangu yayi, ntangu Yandi kwizaka na Simon, Yandi tubaka na yandi nani yandi vwandaka. Nge ke kwikila ti Nzambi lenda tuba na munu yinki kele nkumbu ya nge? Yina ke sala nge kukwikila dyaka? Mutindu yina? Madami Strong... [Mpangi ya kento me tuba, “Stout.”—Mu.] Stout, nge ke kwikila? Kwenda mpe kwikila, mpe nge... Ya me manisa. Amen.

¹⁸⁵ Kwiza. Nge ke kwikila? Mu kele mpe nzenza samu na nge. Mu zaba nge ve. Nzambi me zaba nge. Nge ke kwikila ti Yandi lenda lakisa munu yina kele dyambu ya nge? Mpe kana Yandi sala, kuna Mfumu Nzambi kuvwanda ya kusakumuka. Ya kieleka? [Mpangi-kento me tuba, “Yinga, ya kele kieleka.”—Mu.] Ntangu yayi kutala ve—vwanda na boma ve, nge me mona, ya kele—ya kele Yandi, yina beno ke na kuwa na nzutu yina. Mbote. Nge ke na kubelaka mpe na kimbevo ya kudasuka, kidi- kidi ya yintu, mpe nge ke dasukaka samu na kima ya mpamba. Mpe nge ke na

belaka mpasi na ngamba-ndudi, kima ke na kutambula mbote ve na foie, mpe anémie. Ya kele kieleka. Nge ke na kima . . .

¹⁸⁶ Bakala mosi ke na kutalanaka ntangu nyonso awa. Nge ke kwikila ti Nzambi lenda kubelusa nge? [Mpangi ya kento me tuba, "Yinga, mu ke kwikila."—Mu.] Ke belusa bakala ya nge, mpe, kukumisa yandi mbote? Nge ke kwikila ti kimbevo ya estomac ke katuka, mpe ti yandi ke vwanda mbote? Ya kele yina yandi ke na kubelaka. Kwenda tula maboko ya nge na zulu ya yandi, tuba na yandi mutindu yina, mpe ya ke—ya ke katukila yandi.

¹⁸⁷ Mu kele nzenza na nge. Mfumu Yesu zaba beto zole, Yandi zaba ve? Nge ke kwikila ti Nzambi lenda kukumisa nge mbote? Kana Mfumu Yesu kulakisa munu kima yina . . . yina nge ke . . . yina kele na kati ya ntima ya nge, nge ke kwikila ti Yandi ke kumisa nge mbote? Nge kuzwaka mpasi mosi. Nge ke na mpasi na ngamba-ndudi, kima mosi. Mpe kima yankaka, ya me sala ngamba-ndudi ya nge kuzwa mputa, kasi yina kele yina dokotolo ya nge kutubaka. Ntangu yayi, kima yankaka kele, ti ba zola kupasula yawu. Ya kele kaka kieleka. Ya kele kieleka ve? Ntangu yayi nge ke kwikila ti Yandi lenda sala nge kuluta na yawu ve? Nge ke banza ti lukwikilu ya nge kele na Yandi? Ntangu yayi nge zaba ti ya kele munu ve yina ke na kusala yawu. Nge ke kwikila? Mbote mingi. Kwenda, mpe na yina nge me kwikila, ya vwanda mutindu yina na nge.

¹⁸⁸ Beto kele banzenza mosi na yankaka, mu banza. Mfumu Nzambi zaba beto zole. Nge ke kwikila ti Yandi lenda kulakisa munu bima yina lenda kusadisa nge? [Mpangi ya kento me tuba, "Yinga, mu zaba yawu."—Mu.] Nge, nge ke kwikila ti Yandi lenda. ["Me ndima."] Mu ke na kutuba . . . "Kundima," ya kele mbote mingi. Ya kele mbote mingi. Ntangu yayi nge ke na bima mingi yina ke na kutambula mbote ve na nge, poto-poto kele mingi mpe mambu, mpe mutindu mosi ya kukosola, mpe nge lenda ve kubika yawu. Mpe nge ke dasukaka mingi. Mpe—mpe ya, ya kele kieleka.

¹⁸⁹ Dyaka, nge ke na kizitu mosi na ntima ya nge, mpe kizitu yango kele samu na muntu, ya kele mwana ya nge ya bakala. Mpe yandi kele na dyambu, mambu na yinzo. Yandi na kento ya yandi, konso ntangu bawu ke swana-swanaka mpe ke landila . . . ? . . . Mpe nge ke na kizitu samu na yawu. Ya kele kieleka. Ntangu yayi nge ke kwikila na ntima ya nge nyonso, mpe nyonso yina ke suka mpe ke manisa. Nge ke kwikila ntangu yayi. Mfumu kusakumuna nge.

¹⁹⁰ Mbote, tata? Mu kele nzenza samu na nge, mpe—mpe nge kele nzenza samu na munu. Mpe ya ke—ya ke banda . . . Ba-vision ntangu yayi, mu ke mona, ya ke talana mutindu yinzo ya muvimbba ke na kukumaka kaka na nsemo, mutindu kidyengila mosi yina ke na kutambula. Nge me mona? Kasi nge ke kwikila

ti Mfumu Yesu lenda lakisa na munu samu na yinki nge kele ya kutelama kuna? Nge ke kwikila ti Yandi lenda? Mu ke kwikila yawu, mpe. Mu ke na kuzonzaka kaka na nge, samu na kukutana na mpevē ya nge, kieleka ya kele samu na yina mu ke na kusalaka yawu. Nge me mona, mu zaba nge ve, na yawu ya fwanda kima yankaka ti munu na kusala yawu. Mu fwana kumikatuka kaka munu nyonso na nzila munu mosi, ti Yandi sala yawu Yandi mosi. Nge me bakula?

¹⁹¹ Ntangu yayi, dyambu mosi, nge ke na kubelaka na mpasi ya kudasuka ya ngolo, mpe mpasi ya kudasuka yayi me vwanda ya mwa ntangu. Ya kele kieleka. Mpe mpasi ya kudasuka yina me sala nge kuzwa hypertension, mpe. Mpe nge kuzwaka mpasi mosi. Ya kele yawu. Tuba, to nge vwandaka mulongi, to nge kele mulongi. Ntangu yayi nge kele mulongi; mu me mona nge na chaire. Na yina, vwanda na lukwikelu na Nzambi, mpe kudasuka yina ke katukila nge. Milongi nyonso kele na yawu. Nge ke kuma mbote. Vutuka na chaire ya nge, mpe tumama na Nzambi mpe vwanda kieleka na Ndinga yango, Yesu Klisto.

¹⁹² Nge ke kwikila ti mpasi ya nge ya mukongo me katukila nge, yina kele ya kuvwanda na kiti? Nge ke kwikila yawu? [Mpangi ya kento me tuba, “Yinga.”—Mu.] Mbote, tata, na yina landila kaka na kukwenda na ntwala, na kutubaka, “Matondo na Nge, Mfumu.”

¹⁹³ Kwiza, kento. Mbote? Nge ke kwikila ti mu kele kisadi ya Yandi? [Mpangi ya kento me tuba, “Kieleka mu me kwikila.”—Mu.] Mbote. Nge ke kwikila ti kimbevo ya bumama yina, kimbevo ya bakento, ke katukila nge? [“Amen.”] Nge ke kwikila? Na yina kwenda na ntwala, tuba, “Matondo na Nge, Mfumu.”

¹⁹⁴ Mpasi ya luketo, mpasi na manima, na mukongo ya nge. Nge ke kwikila ti Nzambi ke belusa nge mpe ke kumisa nge mbote, na yawu? Nge ke kwikila ti Yandi ke kumisa nge mbote? Mbote, baka . . . ? . . .

¹⁹⁵ Kwiza, kento. Mu kele nzenza na nge. Kana mu tuba kima ve na nge, ata fyoti, nge ke kwikila ti Mvwandulu ya Nzambi kele awa samu na kubelusa bambevo? [Mpangi ya kento me tuba, “Kieleka, mu ke kwikila yawu.”—Mu.] Nge ke kwikila? Mbote, kana nge ke kwikila, mpasi ya nge ya estomac . . . Mu tubaka na nge, nge me mona. Ya me—ya me kwenda. Mu tubaka na nge, nge me mona.

¹⁹⁶ Mbote, tata? Nzambi ke zingaka na kati ya ntima. Mpe ntima ya nge vwanda lakisa awa bantangu me luta, yimbi. Nge ke kwikila ti Yandi ke kumisa yawu mbote? Landila nzila ya nge mpe kwikila yawu. Nzambi kusakumuna nge. Nge ke kwikila; Yandi ke kumisa yawu mbote.

¹⁹⁷ Nge ke na mpasi ya kudasuka, ya me sala nge kuzwa mpasi ya estomac, mputa na estomac. Ya ke salaka nge mpasi na manima

ya kudya. Nge ke kwikila ti ya me manisa ntangu yayi? Kwenda kuzwa kima ya kudya.

¹⁹⁸ Ya kele mutindu mpasi samu na nge na kutelama, mukongo ke kwamisaka nge mingi. [Mbevo me tuba, “Yinga, tata.”—Mu.] Ya ke kwamisa nge dyaka ve, kana nge kwikila yawu. Nge zola? [“Yinga, tata.”] Mbote, kwenda na ntwala, mpe ti Mfumu Yesu kukumisa nge nyonso mbote.

¹⁹⁹ Samu na yinki nge kele ya kudasuka mingi? Kwenda kaka na ntwala, tuba, “Mu ke vwanda dyaka ve ya kudasuka,” mpe nge ke vwanda ve. Kwenda mpe kwikila. Mbote, tata.

²⁰⁰ Kwiza, kento. Ntangu yayi, kento ya Éthiopie, mpe bakala ya mundele, kieleka kaka mutindu kima mutindu yina kukutanaka na kilumbu yina, Yesu. Ya vwandaka na kukabula ya bantu mutindu ya vwandaka na Sude, kasi beto kele na yawu dyaka ve. Yesu me sala bawu kuzaba ti bantu nyonso vwandaka bantu ya Nzambi. Ya vwandaka ve na luswaswanu, beno me mona, kana kento vwandaka Juif to Samaritaine.

²⁰¹ Ntangu yayi, kana Nzambi kusadisa nge ve, ntama mingi ve arthrite yina ke kumisa nge kikata. Kasi nge ke kwikila ti Yandi ke sadisa nge, ke kumisa nge mbote? Kaka mutindu kento kusalaka, landila nzila ya nge mpe tuba na bantu ya nge wapi bima ya nene Nzambi me sala samu na nge. Mbote mingi.

Ntangu yayi, ya kele na chirurgien me yilama samu na kubasika mbele.

²⁰² Vingila ntete. Ya vwandaka ve kento yayi. Ntangu yayi, vingila fyoti, ti muntu nyonso kuvwanda na buzitu ntangu yayi. Ya kele—ya kele Satana, ke na kuzola kusala kima. Yawu yayi. Kuvimba, kuvimba, beno zole. Ya kele kieleka. Nge ke na kuvimba, yandi ke na kuvimba, mpe mpeve ya yimbi yina ke na kubokaka samu yankaka yina kusadisa yandi. Kasi Mpeve-Santu ke na kubokaka, mpe. Nani beno ke kwikila, Yandi? Mbote. Telama na mfulu yina, nkento. Telama na brancard yina. Bika yawu, mpe kwikila. Kwenda, kwikila Yandi ntangu yayi. Amen.

²⁰³ Nge ke kwikila? Nyonso lenda salama. Nge ke kwikila? Wapi mutindu samu na beno dibuundu?

²⁰⁴ Ti beto telama kaka ntangu yayi. Ntangu kaka yayi kele ntangu ya kusala yawu. Ti konso muntu... Nzambi kusakumuna beno. Ti muntu nyonso kutelama kaka ntangu yayi. Beno kembila Nzambi. Beno telemisa maboko ya beno.

²⁰⁵ Matondo na Nge, Mfumu Yesu! Beto ke kembila Nge samu na bunene ya Nge, mpe samu na kubeluka ya nzutu ya Nge na bambevo. 

**64-0307 Kimbangi Na Mubu
Soul's Harbor Temple
Dallas, Texas U.S.A.**

KIKONGO-KITUBA

©2021 VGR, ALL RIGHTS RESERVED

**VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org**

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org